

祁縣志卷十四

祁縣知縣陳

時編輯

藝文五

墓誌

明

高士閻師賢墓誌銘

彭

範

叅政

三晉間有高士閻公者識與不識皆稱爲認菴云余官茲土方圖登堂而公已矣恨未有以識面也公嗣子長安君持靜寧半刺陳君時道狀以誌銘屬余夫長安君者與余同舉進士仕於長安令故云按狀公諱師賢字

祁縣志

卷十四

藝文

一

齊之別號認菴世爲太原祁人曾大父棟不仕大父威爲上海稅務大使贈文林郎永清縣知縣父睿由進士起家歷任浙江按察司副使母劉氏封孺人於弘治五年十月十七日生公兄弟五人公爲憲副仲子少負才名童時卽豪邁不羈弱冠從宦錢塘受毛詩於王君篋與莆田吳凌仁和胡昱相友善數子皆名士咸以公公輔期之已補邑庠增廣員潛心理道遂厭科舉之學浩然辭博士就所居會善里奉二親甘旨惟謹二親皆喜公孝與兄弟處怡怡相得至老無閱牆之嫌性好施里

中有急輒罄囊周之不責其償以故生計亦涼甘分茹  
淡終日斂膝危坐晏如也壬辰憲副劉孺人相繼卽世  
哀毀踰制治喪一準文公家禮不效土風作佛事襄事  
鄉俗化之服除構室城北村庄雜植花卉左圖右史曰  
坐其中集田夫野老爲講史鑑品藻古今人物相與上  
下其議論父老咸環坐觀聽呼僮酌鉅觥酬歌詠移時  
靡倦常誦人生得意須盡歡莫把金樽空對月之句掀  
髯長嘯譔然自得塵視軒冕睥睨一世負用世之才甘  
恬退之樂於乎公真當獨行之士也然氣昂不能下人

祁縣志

卷十四

藝文

二

與鄉大夫絕不往來至于鄉人則又油油親附各得其  
歡心家庭義方之訓凜凜子若孫侍立終日未嘗見有  
怠容遣長安君從太原大儒李君約受三禮盡得其傳  
嘉靖癸卯領山西鄉薦舉丁未進士授長安令公不之  
官署但以持已撫民戒行故長安君恪守公訓不祇奉  
上官卒以此搆誣解任公亦不恙惟徜徉出水雅歌投  
壺時人莫窺其際蓋公生有至性習俗所不能染身有  
真樂功名所不能移固太原之鍾氣而黨泰之儔匹也  
嗟夫今之不仕進者孰不曰高士或咨肆任遠遺落世

事或交遊有位依其勢利若是者雖不仕奚足賢乎然則孝弟慈信家鄉靡間有如公者凡幾人耶今年首夏偶病水腫五月初九日卽不起壽六十有八配陳氏太谷憲副陳公璧女有婦德人稱賢母生子繩芳卽長安君娶武氏有孫男三日諮曰談皆邑庠生諮娶張氏談娶陳氏棠棣聯輝可科第望增啟閭氏之間者曰誥聘許氏曾孫男三嗣龍嗣夔嗣愷孫女二長適庠生呂鈇幼許字范尚緒曾孫女一長安君將以是年七月二十七日葬公於先壠之次誌而銘之禮也銘曰士不得位

祁縣志

卷十四

藝文

三

才無所彰託跡衡門名靡弗香居身孝友傳家義方依承先德樂彼天常徜徉自適既壽而康有子有孫厚德流先

直隸大名府通判戴賓墓誌銘

張四維

少傳

給諫戴君光啟之奉詔西行邊也其父堯川公蓋耄壽在堂過里中省焉比報命遂載公來京師給諫以讜正當上意晉掌兵垣已復同考會試公喜見其子之達而安其孝養愉愉如也居無何公疾作思歸給諫亟以情請扶侍西還道次中山公卒給諫既扶柩抵里乃屬李

水部熹狀公世行而爲書祈余銘詞甚哀余不忍辭按狀公諱賔字汝敬別號堯川姓戴氏其先代州人也明初有自代來占籍於祁者世遂爲祁人曾祖子文祖緣父公禮有材諳辟爲縣掾史以文無害見稱諸掾間性喜儒嘗以不獲經術起家自恨取程媪生公穎敏有異質父大喜命之儒垂髫卽能文弱冠補縣諸生下帷自奮無間寒暑視學使者異其文每試必高等簡入河汾書院業益進年甫二十四以選貢入胄監當是時文名藉甚人咸以高第擬公顧以數奇無慮十上有司竟不

祁縣志

卷十四

藝文

四

一遇旣年踰強仕承父命謁選銓部授大名府通判監理宣府南路糧餉宣鎮列屯戍而仰芻粟者以鉅萬數賈人爲間利其間往往潛行賂理餉左右公至則正色持法蒞之倉場肅然嘗攝守蔚州會敵入諸城守具未備而赤白囊交至公爲部署保伍飭器械集糒糲應之甚整暇州人恃以無恐俄而援兵四集士馬有饑色公一夕爲具煇炒千斛給軍其幹局敏贍若此公當官執法不撓而惓惓以潔已愛人爲務甚得軍民和大吏將薦之朝乃復索賄公所公曰吾清貧守一官黽勉自效

亦莫樹尺寸報國耳今若此將安應之不去且有悔乃  
曰於父飄然解綬歸歸而邱井依然偕二三朋舊逍遙  
爲詩酒社者且三十年有餘適也公生平事親至孝務  
先意承其懽遇兄弟族黨情愛肫肫然諸婚喪未舉者  
輒捐貲爲代辦與人交坦夷無崖岸見片長稱之不容  
口赴人之危急之甚於己其自奉又甚約故鄉閭間人  
人德公無間識與不識咸欽慕之以父雅意好儒闢塾  
貽訓孜孜冀以經術成先志今給諫業已榮顯其餘子  
若孫類能率其家學斌斌然稱儒裔也盛矣公以正德

祁縣志

卷十四

藝文

五

己巳五月十四日生萬歷庚辰四月四日卒壽七十有  
二配許氏先公三十八年卒繼配許氏先公二十年卒  
俱有闔德給諫邁兩宮徽號詔恩進公階承德郎贈二  
許皆安人公凡四子三女先安人舉子光政娶申氏繼  
趙氏光教庠生娶許氏光啟辛未進士今兵科都給事  
中娶程氏封孺人女適許九州後安人舉子光肇庠生  
娶胡氏女適許可教馬應魁孫男八人禔社祚祐俱庠  
生祜禔禕禕孫女三人曾孫男四君知君遇君賜君用  
曾孫女一給諫兄弟卜以本年十月二十四日葬公於

城東南十五里之新阡奉二安人之柩而合祔焉禮也  
銘曰孰是明經而靡遂其名孰是好修而弗究其行貽  
慶式穀濟濟滿庭亦既享厥成壽康以榮茲惟德之程  
有鬱佳城既固且寧永世成信視此刻銘

工部郎中李熹暨配墓誌銘

戴光啟 邑人

龍山李公余嘗與之同官京邸出入相友如在里閭時  
比卸政又相與訂盟結社徜徉詩酒一切城府都置不  
問庶幾托言莫逆公既沒余與二三老友哭柩示信鳴  
呼荏苒於茲已三易冰暑矣其子李自知輩卜以今年

祁縣志

卷十四

藝文

六

九月二十八日厝葬縣東新兆與其配王氏董氏呂氏  
合焉持狀請余銘余黯然久之若有不忍爲公銘者翻  
思先民有言一死一生乃見交情余固不文不銘奚以  
見情按狀李氏先隴西人唐末遊宦太原不返僑寓東  
崗洪武初名繼先者遷於祁占籍世廂坊十里遂爲祁  
人繼先傳彬彬生有道有道生鳳於公爲曾祖鳳生子  
瞻子瞻生鑰田趙簡子故里外託什一以遊而內操儒  
行樂善循理嘗不攘逋戶產設粥濟飢配武氏卒繼韓  
氏生公名熹字樂天別號龍山初娶王氏繼董氏呂氏

公生而穎朗甫七歲就里中傳迨十二歲從學於伯兄  
長安丞恕晚返燈下誦讀或無油然菊尖照之垂髻文  
辭雅致督學使者奇其材署爲學官弟子員久之聲藉  
甚每校文輒置高等直指吳公尤器重之曳青矜從遊  
者錯履戶外方業成將售於有司忽丁父艱母氏孀居  
恐爲生計廢學兼理耕織拮据萬狀公曲盡孝養出門  
數四步必告所之不數年韓亦卒於是痛思先訓績學  
益方歲戊午以詩列賢書然猶欲然自視藏修不輟十  
年一燈熒熒風雨不滅也戊辰登進士廷試悉邊務甚

祁縣志

卷十四

藝文

七

爲主司稱賞旣而觀兵部政適西北屢警偏老墩墻頽  
圯屬公齎帑金往修緝之己巳授行人司行人壬申陞  
司副會今上登極覃恩贈乃父如公官韓及王呂爲孺  
人奉使齊籓便道旋里一時人士咸爲榮之甲戌陞司  
正前後居使署七年四奉君命所在皆嚴取子裁供役  
采觀風尚盡忠納獻其平居不苟言笑及居官則侃侃  
直言朝廷以爲雅稱使職丙子陞工部都水清吏司郎  
中奉勅督理通惠及天津一帶河道兼理倉廩等務舊  
分司蕪陋不足容公捐俸修之建雙坊對峙曰仰戴堯

天曰纘承禹纘蓋以禹在帝世平成 績而今若希其明德而以治水焉者也仍起眺樓浚井泉砌墉於灣廠儲水所以障水衝纍石橋於北門以利往來京師徒輿緝竹木局以便儲材雖多所營造而磚石取諸碎餘力役用其間從署廠改觀了無傷害又以新法圍商量木過嚴價給不時殊爲商困乃詳陳疾苦於上以償其貲且自懲胥徒躬携糴殮杜寺人之需索却饋遺之常例商集材廣庶績咸熙通人多樹石紀其盛而通以南千餘里轉輸不留國脉不涸皆其力也大司空郭公註考

祁縣志

卷十四

藝文

八

滿有體國本於忠誠河閘之衆工悉舉立身慎於防檢出納之纖弊必除之語戊寅復值慶典加恩父母及妻如制當是時公年六十餘矣宦邸嘗中痰火又不喜曲奉貴人庚辰陞兩淮都轉運鹽使司同知遂請告而歸公以久宦茹蘗積俸饒裕於是置睦族所先濟族之貧者以及隣里鄉黨之遭凶荒者仍捨城西上地二十餘畝爲義塚南澗築石樓樹花木樓中有琴有棋有酒而附以有山有月等名九有樓下山環水遶雲影天光拍手狂歌興溢海外題聯其上曰愛道肯干違道譽思君

高起望君樓邑牧張公等見曰樂天之誠憂世之志兩得之矣癸未冬尋卜子夏真跡於西河遊天龍洞以天龍二字與已字號合掀髯而笑曰今而後謂我爲洞中人可也及明年西遊華嶽東遊岱宗仗策騎驢遨遊勝地起甲申迄癸巳十餘年名山大川無不遊歷其豪逸放達類如此公信實剛毅人有失面折之或屢爲僂巧所誑人得其利已當其失亦亡攸責其欺也生平不絢美不喜甘脆綺麗之供家常食飲見多味必半撤去常衣卽累經澣綴弗棄去不乘輿田冠野服混迹稠人中

祁縣志

卷十四

藝文

九

見者或以老叟相呼初不知其爲大夫云極嗜學每發憤至忘寢食與人論討講一章書通及數十章津津貫穿灼見至旨無論立談坐語常竟昕夕不倦晚年益究理學好讀周易及明道先生定性書書於屏几居安樂玩彌久彌篤有絕韋遺意最不喜象山等語錄以爲禪學不宜附真儒而訂學部通辯明禪學顛狂之失示吾儒正學之的付剗以廣其傳曰道在是矣所著講說時義及古文辭有大學訓旨洗心臺文稿竊言俱不存宜人王聰慧真淑閑於內則上奉宗廟舅姑下御疏戚

僕從慈敬之聲闔外內如一董蚤嬪儒門克修婦德呂節儉持身善相夫子事孀姑韓宜人奉養不少怠尤長于治家人產亦以勤孝聞公正德庚辰年十月初二日生萬歷甲午年正月二十二日卒享年七十有五男二長自知監生娶武氏次自問庠生娶趙氏繼娶羅氏桑氏女一適邑庠生馬化麟孫男二長而淳廩生娶武氏次而洵庠生娶許氏曾孫男四女一皆幼公登跡衡門奮身甲第自少自壯多遭窘厄而志趣超越動以天下事爲己任膚功可奏華要可躋期頤可待乃以朴畧生

祁縣志

卷十四

藝文

十

往往不諧衆口官止同都轉使壽未彌八紀使冲霄宏抱竟齋以没天之所以靳公者何其忍哉雖然得全全昌或必有陰隲于幽泉厚報於繼世者銘曰人皆有死誰當樂只相彼展也君子幹國勤家焦勞莫齒有美之良並名野史百千餘年貞珉在此

河南右布政戴光啟墓志銘

李維禎

京山

余分守大梁時祁戴公自西夏憲使遷右丞以邊事棘未卽上余攝之久而公至相得如平生歡無何有流言公遽行余復攝所司清戎督賦雨事公興革利弊悉當

情法守而勿失越十六年余承乏晉藩臬使人存問公愧不能式廬大比士得仲子文度取高第而不果今甫以明經待詔公車也而公卒且十二年會余友尹于皇爲祁令才仲子體貌有加仲子介之以李中丞所爲公狀請墓誌曰此先人治命也先生其無辭余知公稔按狀言無溢美采而志之如左公名光啟字仲升先世自代徙祁者曰成忠四傳子文子文子緣緣子公禮公禮生公父賓以大名別駕晉階奉訓大夫祠鄉賢詳張文毅公誌中母許安人三子公爲季生而敏悟覽書輒誦

祁縣志

卷十四

藝文

十一

屬文立就父喜是必大吾門矣喪母哭泣擗踊見者憐之弱冠補邑諸生試屢冠首從楊郭二先生學祁寒暑雨不輟功甲子舉于鄉辛未成進士敵新附廷議除甲科任邊寄者授會寧令削一切苛政省費寬徭以羨金供傳置不煩民流移復所詔履畝均田如額而止不加賦始築東關城什伍守望相助禽隣邑盜魁邑桃花山盜藪聞風遠遁曲周王司馬閱邊薦其才可大授也居四年會寧人有神明之目或以其名止兒啼生爲立祠名拜工科給事中知無不言則有請以臬憲攝馬政請

給厥庫關防之疏已進禮科右刑科左兵科都給事中  
則有明詔旨議撫臣修問刑條例格大監用營馬之疏  
論誠意伯劉世延多行不義倏廢倏復且謝且辯言謝  
則不得辯言辯則不得謝因辯以謝謝不誠假謝以辯  
辯不信疏未卽下人爲公危上知公言忠世延受罰計  
吏有大班糾劾例公聲吐宏暢上問爲誰左右以名對  
上稱善侍經筵目屬之持節封永和王隨奉命閱陝以  
西三邊悉心區畫所條八事甚爲江陵相所知同考會  
試申文定亟稱其知人以父喪歸服除除刑科序遷河

祁縣志

卷十四

藝文

十一

南叅政分守河北百度維貞八攝藩臬諸篆應之裕如  
歲凶民饑設方畧以賑全活鉅萬潞府工興計工出值  
令民自應募閭閻無擾晉西陝觀察使備兵西夏西夏  
三面控敵餉誦士呼庚癸酌盈濟虛師有宿飽督府梅  
公一切倚辦公敵忽要賞停市咨公三策不市而去市  
而後去不與市不去知彼知已當在中策果如所料守  
備某幾敗市事亟從與大將軍鼓行而前敵辟走家丁  
以汰浮食歸怨於其鄉大夫將不逞以嘗撫臣公名而  
諭之餉不敷吾責也餉外吾何可過子女曹不畏吾劍

耶皆頭搶地謝而退簡師庀賦屹然國家干城忌者誣公取江陵子爲行媚許文穆獨明其不與江陵昵其爲令人秦闡錄春秋士六人皆一時選也誣者遂寢稍遷河南而修卻者復噉台臣抨公曩事或謂公曷自理曰吾不能與衆同塵內省不疚何容辯辯欲何爲遂歸構適自園於宅東偏曰與所善游讌觴詠間爲詩及小詞俱清綺有致又采形家言葺學宮立書院建文昌閣祁文人以故曰盛自卜兆城南四十里之壽庄往來其間徙先人墓穴與庄相望寄岷岵之思雖畎畝不忘君聞

祁縣志

卷十四

藝文

十三

朝事若西夏變曰啉拜以逆子故迫而成其人可一檄定也倭易與耳用購固非而勞師動衆大損國威況我兵實偪朝鮮而處侵攘驛騷夫何以得外夷心其成筭類此素無病哭伯子過哀遂病逝矣是日尚以臣事君忠時執誦之云公貌頎偉美鬚髯望之甚莊而就之甚溫膽知過人而深中隱厚先世督亢田讓之伯氏親族衣食婚嫁不給者取資如寄歲輯茅施義漿以安行旅疾惡如風事已卽消加之橫逆了不爲意不謁公府不赴賓筵民所疾苦直言無諱教諸子以樽節退讓守終

惇固母情行真宜仲子多文爲富動不踰閑晉人稱公  
有子矣公卒萬歷四十有一年十有二月初十日距生  
嘉靖十有八年六月二十有六日年七十有五祁尹以  
輿論祀公鄉賢配程孺人貢生天喜女子三長濬昌縣  
學生娶祭酒閻公樸孫女先一年卒次運昌卽仲子娶  
淳化尹郭公儒孫女次沛昌太學生娶御史陳公功女  
繼權氏三老三省女女一適京兆田公疇子太學生慶  
年孫男六廷柎縣學生娶陳太學生必鑑女廷梅娶渠  
三老通落女俱濬昌出廷桓邑庠生娶任三老世廉女

祁縣志

卷十四

藝文

十四

廷栻俱運昌出廷杼廷柎俱沛昌出孫女三一適前陳  
必鑑子庠生奏堂一適寧化府儀賓程知務子振奇沛  
昌出也一幼運昌出也以四十有三年十月十七日葬  
自卜之新阡銘曰

官守言責分殊而盡職同秉憲詰兵事殊而奏績同三  
秦兩河人殊而頌聲同名宦鄉賢地殊而奉祀同外臣  
方伯位崇踰老以天年終子孫箕裘冶弓金石文在坎  
中公也明神罔恫

四川真安知州李自問暨配墓誌銘黃景昉

內閣

余觀余友文集所傳王右丞墨蹟異之云右丞故祁縣人蹟藏元隧中至萬歷某年始著邑潛江令李公深加寶惜手摹勒播之歌詠余意李公特嗜古雅流用以藻飾吏治耳已乃知其儒者故潛精性命學晉人所爲稱鳴六先生也公諱自問字無言其先自太原徙祁高王父子瞻有潛德生鑰鑰生熹登隆慶戊辰進士官工部以文章氣節重贈鑰如其官公工部仲子也幼端敏善文爲父友館閣諸公所器以高才生受餽隸河汾書院靡敢齒易之者先後學使者試屢前名在傅司成新德

祁縣志

卷十四

藝文

十五

李少司馬成名伯仲間公意顧邑邑不自得曰學止是乎儒更有向上一著會聞江右余公宗濬倡姚江學悅之公之於靜專淵篤其天性也生平視世味漠如旣聞道痛自刻厲嘗冬夏却爐扇三年凡先賢語錄近儒宗旨概能撮其精微以至律歷河渠屯政邊防諸大政亦多所叅攷慨然曰學在是矣致知非內格物非外時時提起念念放下大都本主敬入門徐質之河津復性江門主靜姚江良知豐城止修之解罔弗合者己酉舉於鄉主文曹公珍最加賞識壬戌署臨晉諭復與渭南史

公記事往還商榷士服其教歲連登科第數人直指至特以理學名儒薦然當事落落鮮知者授楚潛江令非其好也勉之任詢民疾苦爲修築堤塍無筭按冊稽賦躬清出匿田三萬充藩府贍租之額民賴安堵時有聽斷溫顏開諭之而已三載政成擢守蜀眞安州念工部公業得綸贈遂決意歸綜公生平初以才士名終用循吏著俛焉孳孳乃惟以學問一大事未明爲恐有所師友皆海內名流著述甚博余生幸與公同時南北阻遠不獲一把臂交余之於斯道也終夢夢焉已矣公居父

祁縣志

卷十四

藝文

十六

母喪如禮恭厥兄撫孤侄厚垂老不識等斛施人忘報望而知爲醇龐遇大利害稜稜必伸其志素與昆陵繆公昌期友善方璫禍熾諸君子危僅旦夕公正色曰一時邪焰有盡千秋清議難泯人定勝天終有見睨之期其卓識不撓如此識者又知公涵負遠也公生隆慶四年正月初一日子時卒於崇正十年六月十四日卯時享年六十有八元配趙氏繼羅氏桑氏俱贈孺人桑爲少叅仰齋公孫女佐公學舉案靜肅事姑孝所視自賓册姻鄙暨僕御輩咸有恩禮子女皆桑出又繼母氏侍

公宦遊賴其力男二長而淳選貢生娶延慶知州武惟謙孫女次而洵丙子舉人娶西鄉知縣許台儁女繼閻萃謨女女二長適平涼同知吳戴光男用極戊午舉人次適兵部右侍郎鄭宗周男立忠庠生孫男四長人文庠生娶光祿寺署丞母各女繼渠通雒女次人吉庠生聘廩生閻玠女次人善聘國子生張士奇女淳出人杰庠生聘尉氏知縣戴運昌孫女洵出孫女二一適廩生溫而理子且惠淳出一字徽州知府頡鵬子某洵出曾孫男一人文出四孺人同 公葬縣南之新阡屈指公

祁縣志

卷十四

藝文

十七

曩昔交遊盡矣卽友夏亦前沒銘謬屬余銘曰公舊隱姑射山房其誠子云當虧人及人虧時心神孰康當勝人及人勝時精力孰強當人知及人不知時意味孰長旨哉老虛靜易微滄滄涼涼夫烏知濂雒關閩之派之邇在晉陽條山東去河水西望有四青烏離哉是爲古儒者之藏爾後允臧

明延慶知州武公惟謙墓誌銘

李成名

侍郎

公諱惟謙字德光別號契元祁人先世詳行狀中公父尚時有隱德嘉靖末客干清豐蛻化彼地遂占籍焉公

於萬歷辛巳補清豐弟子員每考輒優叙時知名士若  
朱公冠張公養正同公誦讀尊經閣下不爐不扇者數  
稔廣文李君扁曰三鳳巢嗣是朱張成進士公亦乙酉  
中式北闈越明年偶以查籍仍以弟子員屬祁己巳拔  
於羣國士中乙巳筮仕爲懷慶倅善政種種具人心腑  
間庚戌擢延慶知州隣徼外戍卒與民雜處公百法調  
停惠威並樹人至今稱之蓋公才智敏練饒有精力雖  
轆轤藤茸迎刃立解居恒自奉極約而急人之急如赴  
水火人品心術王彥方一流人也癸丑以計典解歸曰

祁縣志

卷十四

藝文

十八

偕姻友暢飲風流調咲愈老不衰庶幾其孔北海乎兩  
孫承訓文譽藉甚行將聯翩濟姜爲奕葉之光焉公以  
嘉靖三十一年四月十三日生天啟四年二月初二日  
卒壽七十有三配陳繼段納李男一緯庠生娶何繼渠  
女一適清豐韓生春孫男三之麟庠生娶許之鳳庠生  
娶孟繼渠之英幼孫女一適李生而淳曾孫男一而文  
娶戴曾孫女二一適原一幼將以某日葬公于白圭之  
原先期介孝廉吳君狀丐銘余旣不獲辭誌曰天人之  
際其不可知者耶以公世澤厚德宜致膺仕以慶于延

而十載勞人厥施未竟君子惜焉夫天之于人不急啟其藏若閔若惜聽伊自致乃大發之以定其祥此羸縮之凡人莫知者也公兩被躓踞夷衷坦坦不自極于窮夫隱享天心克完其懿者與銘曰孰踣其名而卒克豐孰敷其庸而俾不終謂异者人天實攸同第第有中惟公之逢後嗣其興公藏永隆

大方伯戴公合葬碑銘

黃景

江

矯太岳之軒龍嘯晉陽之叅虎液汾淫潞跋德水於三門非臺駘實沈之所治而伊祁氏之所振德區者歟稽

祁縣志

卷十四

藝文

十九

古帝而食流風必世騰德族况萬禩一開乾闥者 今有聖人宜奮尺水注響歸昌若大方伯戴中齋公厥仲之興以際實儕凱元之十六仲舉孝廉距公之捐賓客東杓已十六指仲之對南宮成名進士距公掩玉東杓又二十四指生堯鄉而出事 堯主臣服伊始迺重念子事未終將乞假展夜臺卽余誥曰先子草宿矣封如禮爰有馬鬣樹如禮爰有松楸其封度式位其樹數式命亦如周家人典制李太泌之垂銘在室文西極表其介事以行然皆卧石也則巋然勒立石 敢以先生請

余旣襟若先懿又不敢格孝子不朽其甫之意謹冒銘  
表之概於講幄退食私寸晷而召穎主曰公代人也諱  
光啟字仲升七世祖成忠始移家祁迄父寶以大名別  
駕階奉訓爲鄉祀賢丈夫三子咸出許安人季卽公也  
公卅而慧目光駛羣書行文則風生五指奉訓奇之以  
爲繞曰十匝壓玉千蹄者矣幼失慈哀踊若成人弱冠  
翹聲半宮冠軍輒手擷遊於楊郭二先生其嗜學不異  
經臺董薛也登甲子辛未兩科于時乎髦落八月之焰  
廷議用甲榜控之兼采才識鄭重不輕開邊釁者得公

祁縣志

卷十四

藝文

二十

以出令會寧山荒隴口漠暗雲魂豈文密可持也公至  
刷支費截蔓徭捐羨給郵呼索不及於哀鴻賦如畝無  
額外淫也而東閩之女城約版不勞遂擁隱笳之玉堞  
綠林偃隣邑擒其魁戮之卽本邑窟逋逃之桃花山亦  
爲一掃各駭去草雉禽儻不煩將吏曲周王司馬大閱  
邊令特刻公爲戡定才而邑人威之至名可止兒啼生  
酌祠蓋鑰者百里睥睨殆萬餘里已 召人初給事工  
垣其勁氣拔不周之風疏請以臬長典數馬泊典筦符  
獻惟納旣自禮刑左右晉掌兵諫其間議詔旨議撫軍

臣議修間刑條例議中貴不應擅營騎議勲劉誠意世  
延廢復辯謝之失當皆忠直中 上意大弊吏例有大  
班糾劾公颺言聲振萬石鍾 上爲聳聽問左右而腹  
其名它曰直經筵而屢勤 天顧固極稱殷遇也封永  
和王甫繳節卽部行關以西三閱塞而八條事江陵輔  
臣石其才寔心折之而申文定總試禮闈庚以公所進  
甚得士外內武文何其胸萬介兵而復眼雙秋水也捐  
怙脫經再主刑垣以序遂出公叅政河北時藩臬乏人  
公入手數篆無指多視亂之虞而理衆絲若一殊甚楚

祁縣志

卷十四

藝文

二十一

楚年不實公畫賑以生萬死人會建藩於潞以大役動  
大衆將無厲公弗一民之勾懸錢召工邸落成而不騷  
牖樞真至德可以飲食者乎晉觀察治兵西夏抗祁連  
於其腦穴而隻臂莫拄者三面環衝且塞下皆健兒善  
譁不善附一宿不飽坐者競起而公曰椎饗投石超距  
士爭爲可用肆督府梅公倚輕重市以讐敵至要賞而  
中變敵且讐華人公策之三敵果出中策及裨將暗事  
幾敗市公趣大將亟鼓前奪其息敵竟亡去督撫下汰  
食之令衆以鄉大夫之豪者殺其腹羣起足相躡將脫

兜鍪呼其門公覘得情急召致之曰余柄餉餉失恒額  
惟余咎弗恒額而溢是涎若輩謂吾劍不利耶衆頭地  
崩接極謝無敢異乃遣去夫天劊昂畢必有鉅人爲不  
鍵之玉門邊烽戍火半壁連于百城方方公於范龍圖  
辟歷西夏而娟公者讓公之曩入春闈注私相子直緣  
介甫舉雱而南宮爲和露倚雲之栽種獨許文穆廷直  
之以明其不私且公作令時分閱秦闈雋六士而皆麟  
之翹者肆飛言不翼也量移中原右岳郟人復牽臺臣  
撫公曩事或曰是烏可無辯公曰蠻觸非所爲也掉頭

祁縣志

卷十四

藝文

二十一

賦歸去堅以廿餘年分萍聚葉之賢冠而掛之松風窟  
夢之間築適自園日遊讌所知每曠然得句自成幽致  
誅祁荒而建六匡之閣以俎文昌置書院於半璜之右  
爲學廡起頽於是祁士倍夙昔城之南有壽莊公自爲  
兆且移先城瀕之曰一徑露霜將長與先人共寒食也  
路謝金微矣而軍國大計常隱縈襟耳西夏警至曰  
是固一檄可以定疇拜耳海上訂曰購倭匪畧勤遠亦  
左謀其維持社稷深心無塹出處蓋數十年如一日也  
居無病以哭其伯子太創竟假蛻行行頃猶喃喃臣事

君以忠制菟謂稿爾就木約公平生其器閎以深其才  
練以達其應事遇物不賓賓小節而嚴於大閑愛其伯  
氏義推督亢之田而親族待舉火者不減晏大夫之數  
十家馭惡如冰雪能化卽不復問馭謗如風颺過身而  
不可留痛絕請謁而遇地方利弊復耻作磨兜堅誠諸  
子往往語逼古人雖以厥仲之瑞比鳳麇仍不忘引舌  
相示也以萬歷之四十有一年卒崇正四年祔其程孺  
人而合葬焉傳曰葬者藏也雖然蒙叟之欲德烏鳶怪  
弗經而珠含玉斂錮金以封非固也聞之正有德邱衣

祁縣志

卷十四

藝文

二十三

冠亦壽何藏之弗深但所患者藏骨而不藏名牡山牝  
谷歲久變遷而老樹來風路人指點曰聞某公之生也  
處家克大其家若此宜家之世不祧居鄉克賢於其鄉  
若此宜鄉有社祀立朝克入忠一人出沐浴萬黔首若  
此宜隨在有名宦祠茲隆然者其公與其元配之萬年  
室耶則公雖藏而使公不能藏其德之在人心名之在  
人口者真勾吳題札介山書郭硯首淚羊古今一嘆慕  
不獨不可磨者爲黃子之一片神道碑也銘曰  
天道回環浪息波澄五十年間復思江陵彼相也才大

車寔乘凡所樵獵悉爲薪蒸煇煇戴公聲宏髯美夜直  
鑿坡朝請諫紙代藩節過秦塞車止竦立班心如果中  
李翹材之館孰念平津將安將樂公轉厭人於人匪疎  
於相匪親幻榮浮譽總屬灰塵惟有貞心蹈遐愈馥澤  
湛鄉邦道尊巖谷如千仞姿如萬間屋神之聽之介爾  
景福穀也食子茲語非誣鬱彼璿源是產靈珠仍求彩  
筆高表黃墟不朽之託亦楚大夫晉楚何擇曰惟公志  
曾叅薦棗屈到思芟不鄙閩音碑及鼻屨萬有千春罔  
敢失墜

祁縣志

卷十四

藝文

二十四

雄令孺人范氏墓誌銘

文翔鳳

三水

范孺人門人許雄縣台儁配台儁祁人字六符六符試  
冠共輦孺人歸歸三日而文師促遊河汾書院比晉陽  
六符念新婦安能閨遽后王之則舅璋耶許蓋事世父  
母范卽善事世父母世父母語人孝姒姊亦云許生勸  
遊還則厥委有婦也生還以數日世父病告大漸至捐  
客范喪世父如儀禮經傳陰叶度閨人間譽甚弟若女  
弟之嗛緇帛五兩之御將則脫珥奩左成禮弟若女弟  
之不年則又手其呱呱者而子之其呱呱兒今兩生也哀

袞青子家矣其孺人其孺人許生善清貧然賓至必授  
几則孺人能爲不時需也蓋庶幾時聞珊珊佩其旣賢能  
書則誠之無通邑令長公儒先圭竇奈何以訟庭代食  
耶六符遊爲洪洞師洪洞士藪以禮宗母百 尚譁若  
衿婦慙皇帝元文子柄晉學是歲比士鄉秦御史聘詩  
房晉晉御史石首劉以問文子九十四璜之長其以孝  
廉隱者蓋三十有幾人而文子比之以觀藝則心善許  
云往哉其若諧矣文子夏五自汾如平陽過洪洞謂馬  
令今通政鳴世許生者吾命之房吾省詩也可令墨裝

祁縣志

卷十四

藝文

二十五

且益力令曰此君不負先生舉者也昨陬收洪洞弟子  
員未以導入璜許有新命弟子遲遲贄令亦促之使亟  
泣可納贄許爲悵故迂期不至茲亦足以概矣陽曲李  
令今御史元前祁令亦云許師忼質人也文子旣定平  
山之陽士洪洞則第一今御史劉令譽問許師劉生業  
奚如曰前御史觀風弁前文師亦弁先生之於士若面  
命之也馬令與臨汾劉令今御史四端語如許文子蓋  
九旬巡遂畢全晉之案以六月還晉臺則御史今中丞  
大名郭公新代至七月杪方伯今大司空南公語文子

郭公之檄吾省聘者許教官台儁也文子曰我所定以呈劉劉蓋案之以待郭者也南公日子奚不李薦而以教官曰我長教問以教典之官可應以李耶然許生且得人此吾所弁之三十幾人之比藝獲者必不左許生入關闡得六士其冠房以涇陽馬御輦元御馬生遂冠其榜關闡之第一人少者則先夫子年十九大宗伯王衷白先年二十李空同先生年二十一大京兆呂定原先生年二十二其次則馬生稱少儁六符還以所錄士行卷呈晉臺文子則坐之勞之日子乃能變我關闡既

祁縣志

卷十四

藝文

二十六

衰士曰弟子之不耐關士習太平平也秦材寧殫是亦取其得夫子之調者二三子而已矣癸亥甲子之間文子在南勲卿其門朱給事國棟令蕪湖贄以弟子禮命之曰漢人受業稱弟子弟子之弟子門人也其少者門童子於許吾門人也乃又弟子乎又四年戊辰其門劉恩縣含輝亦成進士而文子避寇長安其門李昌齡仁徵亦稱弟子李生馮學大蹈禮文子爲作直方大母傳明年己巳元御亦避寇遷覃文子文子之獲收其士以才參矣其獲元御旦夕問字過以爲賢於千萬人之不

同堂越天一方者而六符亦自洪洞令雄縣其婦皆久之覃命孺人雄縣迫都門劇東郵之驂文子初令東海過天雄嘗登其林令堂諳其俗蓋貂寺之所叢也雄有先夫子門人郭吏部教之以少小諳其俗艱於治而六符至則節貂寺之不律登其城曰茲不足盜當安屏敵則大城雄不病一夫一緡之騷而樽節以層其堞耳者如霞也稱雄城當己已敵薄都其前騎塵近都縣令擐甲而據其完城以堵變野清而壁堅矣城中人至自捫其頸不知有無戴令欲歸家人其婦不忍去曰生死數

祁縣志

卷十四

藝文

二十七

吾寧於夫子使夫子獨當敵耶蓋生之四十有九年而乃始母國人以禮宗母諸顯土宜自貴尚謹若衿婦如初俄告病命蘭浴撤浴而以正斃一子三息之先藹露朝也環臍有庶兒全城烏夜啼至拂曉國人良異之比於鵬其諸姬至逾年尚雪涕懷南樛之逮孺人哉雄令不宜貂寺人公論重許令以予秦秦方有漢南之訂予西鄉西鄉君過秦謁文子以十陬之長褻遂因馬生請久孺人以載石則狀其冬又拼自西鄉因元御請也未卽應明陬上日久拼自西云令有十日之暈如趙簡鈞

天之既蘇蘇則曰得夫子以銘吾內蚤授一日之覽觀  
是還丹我矣文子感之以一夕論次則歎曰吾道之於  
許馬擬三世於說詩矣卽元御之娶尚能贊文子之苦  
操於閨誦賢於此女不識孟子萬文子之銘其門人之  
閨不越也銘曰祁冀天雄冀尚厥地建亘其嗣人勦爻  
呂曲極帶元士第次其交蹤爲碩紀天不嵐

孺人戴母程氏墓誌銘

張鳳翼 鴈門

程孺人者祁邑戴孝廉之母故方伯中齋公元配也當  
中齋公捐館時孺人已七袞矣泣血撫膺幾經痛絕緣

祁縣志

卷十四

藝文

二十八

諸子姓呱呱相向強起視事者復十有八年今考終於  
崇正辛未之四月啟方伯之壙而合葬焉禮也其子孝  
廉持頡太守狀匍匐數百里請銘於余余既不斐于文  
而病廢以來復奄然床篲亦何能搦管爲孺人志不朽  
然與中齋公有兩地維桑之雅而且夙企孝廉之賢母  
氏徽音耳之稔矣抑何能不効一言於墓石按狀孺人  
姓程氏於祁爲望族世有隱德父天喜以文學起家登  
里選高第學者稱爲西溪先生有女子四孺人其仲也  
生而婉變貞靜舉止不凡西溪公嘗謂其家人曰此女

有異質他日必偶乘龍之壻當画屏以待時方伯公爲  
博士弟子聲稱藉甚會間名納采遂許嬪焉于歸時才  
十三耳搯摻女手若不習婦事而孺人固內則優嫺也  
家室蘋蘩悉以身任凡潭湯醜面紉葺請補綴一稟于  
儀又推先世腴由以贍伯氏故人稱方伯公之孝友者  
必曰內德茂云方伯公旣攻苦下帷孺人復篝燈佐讀  
軋札呶唔聲相伴嘗達丙夜不休方伯領鄉書取甲第  
鷄鳴之儆居多也嗣是宦轍所經則又時操彤管雖內  
言不出於闥而珩璜報勵往往裨素絲于退食之餘故

祁縣志

卷十四

藝文

二十九

方伯公歷官而稱名令尹名諫議名藩岳中壺之助也  
當公爲給舍時嘗迎養太翁于京邸適奉有巡閱邊關  
之命孺人晨昏定省問視有加泊寢疾則又手調湯藥  
曲進滌灑卽躬浣厠膾無難色久之不諱輒擗踊呼天  
曰何遽奪吾鼻致鞅掌者嬛嬛哉遂扶襯西歸喪葬之  
儀情文備摯方伯公不至哀毀逾經孺人寬之者至也  
初公考最泊再遇覃恩孺人凡受兩封亦綦貴重矣而  
推布操作如故及稱未亡人猶服勤不怠更敦崇儉樸  
常服率至數澣冠婚喪祭費各有經雖米鹽凌襍之微

無少屑越至樂善好施則不難倒儲以應故亡論媼族  
賴以舉火義漿義粥之所暨環祁百里內載澤無窮若  
夫宮觀津梁又在在爲檀越也孺人慈和端謹治家嚴  
而有法嘗誡諸子姓母驕母惰母侈泰失身又曰若輩  
不成名我無以見乃公于地下肆今或廩于庠或升于  
監或舉子鄉其它崢嶸頭角固未有艾也狀稱孺人具  
四美謂孝親教子相夫悖族余以爲更備三難封號之  
榮子孫之盛壽考之祺蓋未易數數見也今於崇正四  
年四月十六日告卒距生嘉靖二十三年八月二十四

祁縣志

卷十四

藝文

三十

曰享年八十有八子男三長濬昌縣學生卒娶祭酒閻  
公樸孫女次運昌卽孝廉娶淳化尹郭公儒孫女次沛  
昌太學生卒娶御史陳公功女繼三老權三省女女一  
適京兆田公疇子太學生慶年孫男六廷柟恩貢生娶  
太學生陳心鑑女繼庠生孔論女廷梅邑庠生娶三老  
渠通洛女濬昌出也廷桓縣學生娶三老任世廉女廷  
棊聘庠生文世顯女運昌出也廷柠娶別駕續孟陽孫  
女廷柟娶武舉王夢龍女沛昌出也孫女三運昌出者  
布政使馬公朝陽子庠生禹中沛昌出者一適太學

生陳奏堂一適寧化府儀賓程知務子振奇曾孫男三  
柁出者爲燭聘孝廉王中興女桓出者爲炅柁出者爲  
焞曾孫女三出於桓者二一字庠生李而洵子出于柁  
者一俱幼茲以本年閏十一月初三日祔孺人于方伯  
公之新阡順生死安榮哀備舉若孺人者可以無憾已  
敬撮其大者而爲之銘銘曰  
結褵而爲淑女奉筐而爲孝婦傲鷄鳴而爲令妻和熊  
丸而爲賢母內德以貞何福不受宜爾子孫振振兮克  
昌厥後於戲孺人阡爲弗朽

祁縣志

卷十四

藝文

三十一

文學戴濬昌墓誌銘

李成名

御史

崑余遊濬源詹公之門得友昭餘戴公伯仲兩公垂髫  
共學比於同氣同心余成進士出仕二十餘年仲公乃  
第南宮而伯公偃蹇不遇遊道出亦已久矣追思曩人  
邈不可得而感慨係之仲公書公行事千百言乞余誌  
墓余知公稔公雖卒終不忍其懿行遂泯泯也誌安可  
辭按狀公名濬侗如其別號也國初有成忠者自代郡  
徙祁是爲始祖四傳至文子文子緣緣生子巡檢公禮  
公禮子賓以大名別駕晉階奉訓大夫再傳而至中州

方伯贈通奉大夫光啟則公父贈夫人程氏則公母也  
公生而不凡性情篤至雍雍然和好近人與之交者如  
坐春風中讀書適自園一洞中洞上爲小徑方伯公往  
來其間每聞輿聲至人窺之見其直也一言一行必請  
命於父母母病衣不解帶者三越月許以身代公後得  
疾將革口猶不言病恐傷父母心其孝敬有如此方伯  
有三子公居長兄弟旣翕無閒晨昏俱以文藝相切劘  
而兩弟忽病病且劇公輟席護之視膳視衣以代父母  
而無見於色人皆難之其友愛有如此學宮圯出資整

祁縣志

卷十四

藝文

三十一

之文昌閣毀出資建之貧者賑濟病者訓護亡者周給  
人有言有伯子而世無困人其仁慈有如此至其爲學  
於書無不博覽讀經則先大義讀史則先治體讀百家  
則先典要棘闈兩經入彀而不果己酉擬正魁填榜之  
夕總裁覓一私人不得悉罷所擬遺墨爲一時傳誦乃  
負經術又如此使天假公以年而得遇於世其成就當  
何如者而竟止於是豈非命哉公卒萬曆四十一年十  
一月二十七日距生嘉靖四十三年十二月十三日年  
四十有九娶閻氏祭酒公樸孫女再繼則朱氏李氏子

男二長廷柵舉人娶陳氏繼孔氏次廷梅貢士娶渠氏  
孫男四上舉人娶孝廉王中興女綸府庠生娶進士張  
暉妹詔娶韓氏俱柵出紳庠生娶王氏梅出曾孫男二  
宸上出窿綸出皆幼嗚呼公可謂有後矣是可以銘矣  
銘曰所不逢者時也所不達者身也而所不朽者名也  
令德及遠發祥有自文學經濟於焉傳也大哉斯邱爲  
無盡藏也

西鄉令穉觀許公墓誌銘

劉含輝

耀州

先生姓許諱台儁字六符穉觀其別號也先世爲河南

祁縣志

卷十四

藝文

三十三

靈寶縣人始祖仲義僑晉冀寧之祁縣洪武間遂定籍  
焉八世祖思舜是爲先生大父思舜生嘉賓乙酉舉武  
闈次嘉賢先生父也淹博儒雅艱一第餽廩終身識者  
惜之娶李氏生丈夫子二先生其長也髫齡輒古人自  
命數萬言目過卽成誦十四而怙恃感疾卧床蓐先生  
侍藥餌不解帶者累月顛天求身代竟大漸距五十日  
兩親相繼見背世父亦卒總角鷄骨支床 毀苦次出無  
怡容君子謂先生於是乎知禮無何回祿肆焰先人墜  
茨丹雘盡於一炬家徒四壁立先生詠歌不輟晏如也

十七補博士弟子員試藝嘗爲豪華者竊改衡文者摘  
伏抵辜繇是學益力小軒橫經兀坐匡床熒熒藜火不  
宵分不休也試冠曹偶督學器之命遊河汾書院萬歷  
丙午薦棘闈上春官試從楚人鍾仲敬遊仲敬負藝壇  
聲藉藉海內無多許可乃獨心折先生數奇不偶乃杜  
門下帷雲龍閣課邑髦士三十餘人剔蠹訂豕無朝夕  
暇後先以雋去者多出其門初諭洪洞時文宗歲試竣  
子衿例宜以艇帛贄邑令促之遊先生故遲遲紆期不  
赴曰余秉鐸而師表弟子奈何以廣文苜蓿藪苞苴耶

祁縣志

卷十四

藝文

三十四

迨學宮束脩儀畢始策馬平水之陽鼎立文社因其邑  
爲子野故地遂以正五弁社名取六律五音義也辛酉  
秋秦省直指姚先生聘葩經房於晉三水文太青先生  
實督晉學遂以先生甲諸孝廉命分校秦闡得六士其  
榜元則涇陽馬元御御輦以文章牛耳菰林海內知名  
士多宗之次則富平朱西崑國棟張懷陸橘高陵吳賓  
於觀光咸寧李仁徵昌齡及余不佞璞玉含輝時嘖嘖  
頌先生知人今上元歲秋杪先生分邑符宰雄縣清苦  
矢諸神明愛民視諸子嫉邪視諸仇舞文逞智者咸咋

舌退避下車循聲蜚四野講堂教士甲乙品題匪怒伊  
教尤體郵窳生不憚捐俸以給薪米佐咕嗶天雄爲朝  
宗孔道星軺宵旦不輟長吏苦之先生節省差繇每年  
得工料羨緩三千盡以之創修公廨邑人罔不稱快者  
高城浚隍垣壘較昔加厚三尺巍然雉堞有金湯之固  
焉厥後有警易水燕山在在震虩而雄獨繕葺無恙史  
氏陳明卿仁錫勒碑紀厥伐修理橋梁曲飲長虹築補  
隄防高落漢鴈表揚往哲煥新古蹟墾荒田四百餘頃  
俾襁褓之子頓田沃壤屯院李含真元特薦其徵收無

祁縣志

卷十四

藝文

三十五

羨耗無加派一切陵工米豆硝鉛諸類每奉文密令長  
鬣之夫預辦不以煩蚩蚩氓部文注上考天下第一每  
對知己言那借實侵漁之別名調停卽廢弛之故態當  
事者以爲名論乃筮仕時以舊令透支銀若干申報各  
院遂爲豪有力者下石誣以多收耗銀註白簡下部查  
覆士民數萬人伏闕上疏願借寇以雄密邇神京非慈  
惠之長孰堪生我賴今上神明廉訪其詳下特旨降級  
照舊管事不數日溫旨復下云降級原示薄懲倘能感  
恩圖報應從原職優擢以彰不測殊恩前後疏凡十五

上旨八下始獲復原官倘非撫字心勞催科德普足以格豚魚貫金石胡能以區區銅墨吏邀聖天子九重鑒注乎三載考績上其卓行於天子天子庸之賜以繩金鉞玉之函贈乃父母官如已官而復爲忌嫉者中傷尋改吾秦之西鄉北至漢中徵糧卹民護城一一如前造士衡文壽以梨棗更若過之性直遂清介每遇掣肘事不能曲徇鬱鬱不得志未幾中痰壅遂決意賦彭澤歸去辭矣抵家曰行李蕭然菜蕪之貧不啻也然毫不以溫涼芥蒂對知道故把臂開樽意甚適已媼戚中有健

祁縣志

卷十四

藝文

三十六

訟者數月相持片言讐服之立解葺一廛顏曰近聖居課子姓呶唔其中至衰白無倦容丁丑而疾始革十月二十七日則先生易簣之期也得壽五十有八所著有雲龍閣文稿遺失無存生平應事接物洞如觀火詳究始終籌度利弊懸揣悉合符敦倫篤誼得天性當其痛廢蓼莪時二女弟一弟呱泣相向幾不能成立先生撫育之愛勞備至擇配訓業內外無間言及乃弟卽世仍留二孤提命而衣冠之永不另爨卽姜被不多讓焉媼友待而舉火者踵接也晚年德益邵書對聯於坐右

自警曰希聖希賢作宇內第一流人物惟忠惟孝扶世間億萬載綱常五倫中乾乾淨淨沒一毫欠帳便是聖賢百年內齷齪齷齪有些子醜名不如乞丐捧誦格言進德居業概可見已先生逝而其壻孝廉李君而洵綜述懿行服官之大者求余紀幽宮之竊石念余不佞辱在先生門士其烏敢辭但先生官不踰一令年未登六秩宗族稱其孝友里閭景其任卹豐德而儉於遇爲可惋惜耳竊憶侍先生聆竝論睨視嶙峋七尺軒軒如朝霞舉丰骨矯矯如雲中鶴談論謾謾如松下風雙眸

祁縣志

卷十四

藝文

三十七

炯炯如岩下電儀貌俊偉一望如汝陽王璉天人也胸中磊砢以酒銷之每飲一石不醉求其稍沈湎冀見如所謂玉山之將頹了不可得至於宏模大度吞雲夢八九不留纖芥然則彼含沙射影者奪先生以尺圭寸組實予先生以千秋令名矣元配師母范孺人克嫻女德先卒於雄縣署詳在文太青先生志及余同門馬元御狀中繼李氏王氏胡氏咸德儷俱先卒男子一于宣娶順天府尹田疇孫女女一適丙子孝廉李而洵卽今持狀請銘者也銘白遇蹇矣厥德則豐守拙矣厥文則工

太霍太行隆崇有道浩氣摩穹手持巨斧闢濛陶鑄英  
髦洪洞起衰八代門中歐蘇沆瀣六龍循蹟漢陽天雄  
儷以女士德朋帝錫鸞章熊熊金石泐名弗讐

國朝

黃梅縣知縣張公墓誌銘

鄭

恂

御史

祁邑張君壽菴乙丑科名甲第也余忝得同榜講兄弟  
之好歡甚繼而公補黃梅而余得量移山右訪其里居  
鄉人稱公懿行有古君子風歲己卯余分校晉闈公之  
嗣君實爲余門下士文章道義知公之開導不淺也及

祁縣志

卷十四

藝文

三十八

余擢居臺省適張門人春闈報捷方待館選以窺天祿  
石渠之藏而公溘然逝矣張門人因泣別余去越三月  
將謀葬公於新阡寄狀請余銘余以世好誼不容辭按  
狀公諱雲松字壽菴別號大林其曾大父諱文選登明  
朝武科大父諱維父諱登殿世有隱德皆不仕以卒父  
卒之日公之生甫六歲嶄然見頭角衆謂張氏有子矣  
稍長能文於書無所不讀年弱冠餼於庠督學徐公延  
諸幕命子弟執經問難於其前文名遂大震家世清貧  
蔬水之費常不給公漠然不以介意而惟以文學起家

爲已任日夜攻苦與孺人紡績相伴常共一燈燈滅膏  
油不繼則暗誦之如是者十年壬子遂領鄉薦壬戌捷  
南宮所居祁之北左里有以橫逆待公者公不與校徙  
居城中然猶篤念梓誼不置也值歲饑里人嗷嗷待哺  
朝不慮夕公捐饘粥之資賑之得無恙縣公有好義式  
瞻之扁旌其門及丁丑又饑時公已任黃梅矣又捐俸  
賑之所全活者無筭縣公有博濟爲懷之扁旌其門凡  
此皆公之厚德渥及於族黨交遊者也其官於梅也甫  
下車孜孜以教化爲先務設義學四十餘所教民間子

祁縣志

卷十四

藝文

三十九

弟梅邑科弟寥落經公振作聯翩不絕至於潔已奉公  
省刑薄斂惠之所及有在一時者有在數十年者有在  
百年百世者年大中丞方以循卓薦公公適抱病遂不  
果後銓部主政缺出 簡命咨取公而胥吏以小故中  
之又不果公慨然曰年踰六旬而有所不得行其志碌  
碌薄書何所底止乎因致仕歸去之日紳衿士民奔走  
相告如失慈母旣爲惠政編以紀其績而又以公所建  
課士書院設位以爲公祠魏莊渠先生有言曰仕官而  
能廟食百世者惟守與令信哉公生於崇正戊寅年正

月二十三日卒康熙丙戌年三月二十七日享年六十  
有九娶張氏有賢行先公卒生子二長翰元增監生娶  
馮氏早世次調元己卯科舉人丙戌科進士娶郝氏王  
氏女二長適庠生鄭紹武次適翰林院庶吉士鄭爲龍  
孫男一道隆翰元出孫女七其六翰元出其一調元出  
以本年十月初一日葬公於縣東三汲村之南與孺人  
祔合焉銘曰嗟哉厥初淡泊自矢好古敏求左圖右史  
施於有政慈祥愷悌道賴以行民懷其惠老而致仕棄  
若敝蹤有子能賢世濟其美

續增藝文

序說傳記碑銘詩歌

戴楓仲楓林一枝序

陽曲傅山徵君

楓仲髫年受知於袁山先生許以氣節文章名世丙子吳中丞鹿友與袁師同志拔晉才士三立書院課藝楓仲聲譟社中少所許可獨虛心向余問字余因其蚤慧規勸之甲申後仲斂華就實古道相勗竟成歲寒之友矣仲明季操選政見賞於千子君常天如諸公所著半可集本經子史唐宋文而變化出焉如風雨集而江波流也惟詩未禦木若有不敢自信者甲寅仲春訪楓仲

祁縣志

卷十四

藝文

一

探奇登丹楓閣見余庚寅題壁詩有榆次孫盛昭餘温嶠之句愴懷往事宿殊亭不寐次日蚤起徘徊雙松下忽天晦大雪落樹皆成鋒刃怪特驚心退而檢架上書遣悶得楓林草殘編讀一過其中有佳處亦有疵處俱帶冰雪氣味大概深於寄托情至之語自能感人畧加澄汰存晉詩一種楓仲遜謝猶不敢自信也自袁師倡道太原晉士咸勉勵文章氣節因時取濟忽忽三十年風景不殊師友云亡憶昔從遊之盛邈不可得余與楓仲窮愁著書浮沈人間電光泡影後歲知幾何而僅僅

以詩文自見吾兩人有愧於袁門

黃葉樓初集詩序

汪志伊 制軍

嘉慶辛酉莫春西村以自著黃葉樓初集詩四卷呈覽  
余閱至集末見其己酉夏謁選閩藩照磨誓墓泣賦詩  
一首中有諒無朘削才誓免戮辱虞二語并注其尊甫  
孔璧官至狄道刺史惠心善政未竟其用卒後照磨奉  
公暨兩宜人柩合葬於祁縣白圭鎮西北之新阡於此  
知其矢志清白因賦詩勉之

朘削無才掩泣題家風清白守鹽壑業將墓誓刊黃葉

祁縣志

卷十四

藝文

二

肯負官箴玷白圭唐俗儉勤吟促織閩民緩急視驅雞  
從今日贊旬宣政好播循聲與狄齊

贈攝漳州府別駕喬君序

葛山 蔡 新中堂

太原喬君西邨以世胄官閩藩參軍乾隆六十年來攝  
漳州石碼別駕篆石碼爲漳南重鎮君爲人廉明素有  
聲鎮民間君來胥迓至郡城無不歡欣鼓舞稱得神君  
時龍溪莠民陳森夤夜殺人因嚇詐富民金不遂輒扳  
詞及之縣蠹役等乘風率羣不逞數十百人來碼按戶  
搜捕爲地方害合鎮大譟君履任甫旬日曰是啟亂也

立拘縣役至重笞之仍關以木索下縣理自是縣役等無敢來碼搔擾鎮賴以安民大懽合鎮紳士匾民歌召杜四字於聽事堂觀者數千人有莊坤者素無賴克橫綽號殺人師傅亡命逃之臺灣數年潛歸衆相詫曰坤來鎮又多事矣坤家只一母見而首之官君秉燭鞠諸庭凡諸授指殺人扳害悉供吐不諱時夜將半門外啾啾多鬼聲衆莫不聞君曰是殺人多矣立斃杖下海舶洪聘柁爲營卒困賭被歐幾死翌日邀黨數百人持械至欲修釁求營卒不得爇其居以去武營甲而譟愆慝

祁縣志

卷十四

藝文

三

叅戎勒兵欲出君毅然馳赴止之曰兵民一也理宜詢曲直可以兵佐鬪乎亟召聘柁驗訊畢顧謂營卒曰事無小咸由爾等困賭所釀我片紙達軍門叅戎爲爾褫官矣營卒懼叩頭請死君對衆重笞四十荷校木屐街以徇海舶千人立紛散冬十一月龍溪東埭南坂一帶山賊乘間竊發夜入石碼縱火肆劫動百人當是時制軍查辦粵東艇匪駐節廈門聞報疊發軍令下汀漳巡海兵備觀察使來碼督拏孔亟君單騎身佩短刀率丁壯一夜馳行深山八十里入賊巢衆擁賊醉酒卧藪中

君出其不意生擒賊首鄭勇蔡羗等三十餘人縛送觀  
察使按問爲首者悉伏法先是武營將卒屢以睚眦私  
拷平民誣爲賊移送有司冒功求賞而反窩隱會匪巨  
盜不問君廉得其實悉縱遣不少顧忌至是所獲各賊  
有脅從及未上盜者亦皆力請保釋未減以是全活者  
甚衆君以六月至石碼每虞海疆重地仔肩匪易日逐  
剖判案牘清釐簿書恒至夜分不寐由是積勞冬十月  
連上五稟陳情大府請代乞回本任不許至十二月始  
卸署事嗟乎觀君之收縣役斃莊坤懲營卒大都以猛

祁縣志

卷十四

藝文

四

濟而獲賊有矜疑又不忍於一夫之辜蓋子產之語子  
太叔於寬猛水火之喻致兢兢焉惟其猛立而寬成故  
後世稱遺愛不衰君政張弛得宜寬猛並用率是道也  
惜君蒞事甫半載卽交篆去未竟其設施使石碼之民  
不得爲寇君之借爲可歎耳署治後有樓舊傾圮君重  
修葺顏之曰畫詩樓公餘日吟咏其中君舊有黃葉樓  
詩集中於三晉文獻尤留心蒐討無遺蓋彬彬乎博雅  
君子也君以儒術飾吏治自非太史公所謂惟武健乃  
勝任愉快者而不爲火烈亦不爲水懦此咸中有慶之

難惟根柢深厚故能時措咸宜也君於廳序書楹曰求  
通民情如得其情則勿喜願聞已過欲寡其過而未能  
觀君之所以見志者豈同夫俗吏補苴罅漏之爲蓋已  
烝烝乎上躋古循良之風而能得力於新建之學者也  
所以發於政事見於文章者有如此石碼士民感君德  
政之深某月朔爲君嶽降之辰合鎮紳士擬相率稱觴  
爲君壽君謙冲若不敢當僉謀製錦書君之所以庇賴  
石碼者聞於後因徵予爲文以紀其實嗚呼予老矣耳  
熟君名久且樂吾鄉之獲賢父母也爰不辭而爲之序

祁縣志

卷十四

藝文

五

樸齋詩賦草序

蔡賡颺

提學

唐生樸齋余丙戌歲督學山右所取士也其詩歌已刻  
之山右校士錄矣至丙午始登賢書今春會試來謁攜  
其詩賦全草求余刪改余以久領部務文筆荒疎姑爲  
之校正而點定之夫唐子之爲人端厚謹愿爲文亦如  
其人獨其詩豪放不羈有不可一世之概其樂府歌行  
多脫胎於香山長慶集 國初梅村簡齋諸前輩其雜  
體諸賦摹倣昭明徐庾而得其近似者律賦律詩工整  
秀逸不失前人矩步亦可云究心於此道者獨其生平

酷嗜摭拾古書而不好揣摩近時試藝其騰發之遲頓者以此其學問之淹博亦以此唐子勉乎哉嗣後學因年進當務爲有體有用之學以幾上達毋貪多務廣以荒其精進之功是所厚望已

夢花軒吟草序

謝維藩 提學

予旣序王君印川之詩李子揚清亦以詩來察其爲人  
訥然退下體羸不任衣數爲哲師鉅儒旌異齒四十不  
得志棲於學官然予觀其邇所爲詩恬適洞達意者其  
有得耶古無專爲詩者後世有竭畢生精力爲之然必

祁縣志

卷十四

藝文

六

肖其中之所有恒謂沖泊合道天民之詩也陶邵有焉  
其次蓋臣節士喟時愛君之作杜公以下代不一二人  
或竟無有又其次陶寫景物抒發襟臆悲喜妍拙雖不  
一其態要必不詭於正而厥旨恒厚厚者君子之所以  
宅心正則吾道之大閑也蓋自輕靡浮薄之音作而人  
心世道有不可復問者矣君詩克自植立今爲學官有  
移世易教之責書所欲語商之

祁大夫字說

呂氏春秋去私篇晉平公問于祁黃羊曰南陽無令其

誰可而爲之祁黃羊對曰解狐可平公曰解狐非子之  
讎邪對曰君問可非問臣之讎也平公曰善遂用之國  
人稱善焉居有閒平公又問祁黃羊曰國無尉其誰可  
而爲之對曰午也可平公曰午非子之子邪對曰君問  
可非問臣之子也平公曰善又遂用之國人稱善焉孔  
子聞之曰善哉祁黃羊之論也外舉不避讎內舉不避  
子祁黃羊可謂公矣高誘注黃羊晉大夫祁奚之字

氏所記與左傳情事頗異新序亦述此事半同  
左傳半同呂覽然皆不云字黃羊也故不引

呂氏春秋開春篇叔嚮之弟羊舌虎善樂盈樂盈有罪

祁縣志

卷十四

藝文

七

於晉晉誅羊舌虎叔嚮爲之奴而臞祈奚曰吾聞小人  
得位不爭不祥君子在憂不救不祥乃往見范宣子而  
說也曰聞善爲國者賞不過而刑不慢賞過則懼及淫  
人刑慢則懼及君子與其不幸而過寧過而賞淫人毋  
過而刑君子故堯之刑也殛鯀於虞而用禹周之刑也  
戮管蔡而相周公不慢刑也宣子乃命吏出叔嚮救人  
之患者行危苦不避煩辱猶不能免今祈奚論先王之  
德而叔嚮得免焉學豈可以已哉高誘注祈奚高梁伯

之子祈黃羊也

案祈祁  
古字通

寯藻少讀呂氏書熹先大夫表德納此懿稱足以補  
杜注之闕而未達名字相應之誼藏之於心每覲通  
人數典必及久之以文來告者發揮旁通爛然可軸  
適祁縣重脩書院成建大夫專祠於院中并幣聘吾  
仲兄寯藻掌書院教司祠事寯藻聞之感祖德之永  
長懼令聞之失墜也用編次衆作棊置祠中以備家  
乘掌故云爾

案先大夫墓始見魏書地形志元和志云在祁縣東南七里今其地名榮仁村

道光二十七年仲春月朔裔孫寯藻謹識

道州 何紹基 子貢

祁縣志

卷十四

藝文

八

壽陽尚書之遠祖爲晉祁大夫奚事見春秋內外傳而  
皆不及其字高誘注呂氏春秋於去私篇祁黃羊云黃  
羊晉大夫祁奚之字於開春篇云祁奚高梁伯之子祁  
黃羊也兩注互證高氏所據必有甚確矣尚書以周官  
職方氏幽州澤藪曰豸从奚聲養从羊聲疑其聲中有  
義有足與大夫名字相發明者按說文引幽州藪正作  
奚養易說卦傳兌爲妾爲羊之羊虞仲翔作羔云女使  
鄭康成本作陽謂養無家女行賃炊爨兩家字異義同  
疑皆作廝養字羔以字形誤消陽者注其音而誤爲正

文耳養从羊亦自有養義孟子庠者養也庠从羊也說文訓奚爲大腹其訓女隸之媵周官正作奚奚之爲女隸猶養之爲女使兌於八卦爲澤奚養之義可會矣然欲以是證祁大夫之名與字則有所難安以大夫字曰黃羊不得略去黃字單執羊字爲說也務求其義則莫如爾雅播羊黃腹一語矣說文播黃腹羊也爾雅此文當播字爲句羊黃腹爲句古从番之字約有二義曰大也白也左傳皤其腹言其肥白也宰夫胹熊蹯不熟獨熊掌言蹯亦言肥厚也易錫馬蕃庶書庶草蕃廡言壯

祁縣志

卷十四

藝文

九

盛也爾雅釋草藜皤蒿據詩疏引陸璣云凡蒿白色爲皤釋文引本草注云此蒿粗於青蒿是兼白與大二義也釋蟲蟠鼠負說文蟠鼠婦也據詩疏引陸璣云伊威一名鼠婦似白魚蓋其形博而且白名以婦者亦取大腹義也羊之肥白者曰播其腹多黃以理推之黃爲中央土色凡物之肥大者其腹必多黃故黃亦有大義羊而黃腹曰黃羊猶人而黃髮曰黃耆也說文奚从大繇省聲繇籀文系字系者繫也凡可繫牽之物而大腹者皆可稱奚茲獨有取於羊羊者祥也善也肇錫嘉名之

意也又莊子至樂篇羊奚比乎不斲釋文引司馬云羊  
奚草名根似蕪菁然則大根駭人有似羊之大腹奚奚  
然故有是名矣名奚而字黃羊非此之謂邪奚斯字子  
魚百里奚飯牛而牛肥疑因飯牛而稱奚故左傳止稱  
百里皆名奚字黃羊之類也至大夫之名大戴記作僂  
史記作僂迻寫增易無足爲據郭氏於籀羊黃腹下注  
云腹下黃至爲簡當近日邵氏郝氏乃俱以後世所謂  
黃羊狀如羊小小者當之初不思此句上下文皆未及  
羊之別種也因爾雅而得大夫名字相因之義又因名

祁縣志

卷十四

藝文

十

奚字黃羊而悟爾雅之義謹質之尚書以爲有當否

明戶部員外止菴戴先生傳

傅山

戴止菴先生者太原之祁人布政使光啟仲子名運昌  
字震存以貴公子有名稱諸生間二十餘年不得第泰  
昌改元始拔入太學天啟丁卯蓋四十九歲矣始以易  
舉於鄉又十年五十九歲而乃成崇禎丁丑進士不襲  
寵爲豪華不熱中仕進天性專精堅韌人也六十一歲  
謁選知尉氏尉氏開封劇邑前任則同年友曹生良直  
曹少年負氣喜功名而先生繼之以矜貴不博一時風

裁如少遜於曹會許狂生酒玄爲所親誣以焚劫通許縣爲之私抵以大盜先生不平之翻其案許固銜之竟無可奈何知祥符左懋泰者險譎多陰計同官皆憚之諸生劉士奇父心顛自經死左旣坐生大逆行取吏部去而先生逕白劉冤釋之或以吏部爲辭不顧夫然後知先生與曹皆山西人無老少皆不畏強禦而風裁乃大略相當如此時中州盜賊蠡起無賴劉光祖李全者煽亂聚數千人偵得之率敢勇士擒斬之扶溝五虎廟貸其醜以才力調良鄉畿輔最號難治中官貴戚雜選

祁縣志

卷十四

藝文

十一

千謁其常也先生不露聲色概謝絕之不爲通有犯則繩之以法某貴妃中表奪民王某女中官齊某家奴侵民田皆抵罪如律房山邏者誣良鄉富民馬古溪等通盜實繁株連先生力爭畀大辟命凡廿有七人其陰德又如此以邊俸例陞戶部員外卽上書請罷練餉報聞會周延儒再入政府陰爲馮銓道地銓輸粟助邊謀復銓冠帶下部議尙書傅公淑訓謀諸郎曰此政府意不復且有禍諸郎唯唯先生徐曰卽復之異日亦有禍尙書悟卒不與復時良直已在諫垣敢彈擊聞先生阻逆

案冠帶事遂擊節大相友善而益敦聲氣焉偶關請餉事小不合雅不能以同鄉同年直名具疏愆懇同官某疏劾陳演以及先生先帝知其冤竟同下獄而曹旦夜滿門十數口人丁速中疫死禍因從前家中鄙事延致先生名譽借光求榮先生直言國事危殆謝絕不允逆其意曹遂暗成萌孽招滅門之禍同謀孽某以誣戍先生事白反坐罪辜得溫旨先生出獄未幾國變矣闖寇亂河南久稔知先生令尉氏政聲有高士邑人阮太沖前後令是邑者皆不得見聞先生高才博學扶危定傾

祁縣志

卷十四

藝文

十二

遂折節爲執友且顏額於公署門擎天一柱大梁孝廉張公民表刊刻辨冤錄紀錄盛事數十種實蹟遍貼於中州道路頌德政云闖寇特召尉氏令上殿有由來也人皆爲危及見怡然加禮欽敬不已甚稱尉氏德政今值在此便大用之先生直陳孽某誣成事年已七十老儒無端遭害心身俱憊不足用世婉言固辭德感闖寇色喜允矣云丈夫有志不可強也脫然無累而去卽歸里入麓臺山不再入邑城不與時貴往來直指黃公徽胤王公昌胤劉公達俱同門友先後按臨至祁欲一晤

語先生皆遜謝不見諸貴人或有書至先生率皆不答  
卽子弟至亦不問城市事閒有語及者亦不應凡禦侮  
弭讐者子廷棻一任之棻力學而明於古今是非有心  
計爲人在儒俠之間麓臺山者去祁邑七八十里荒瘠  
而多虎先生創築小砦居之墾山而田歲頗有獲山民  
因之稍稍成聚先生大布衣羶巾騎一小羸上下山逕  
不仰人扶春秋上邱隴卽大雨雪不敢令兒孫一代所  
御案椅皆幼學時物案隅稜磨就圓而椅且穿棹請易  
之不許曰吾安此晚與一孫寢至髦手不釋卷兩老僕

祁縣志

卷十四

藝文

十三

晨起欵門進湯水畢去田耕耘不再面惟日與田父野  
老道稼穡事每謂子弟曰辛稼軒是有用世之才蓋其  
所寄託可知也有時荷鋤田閒人皆不知爲貴人先生  
或早上砦牆周望望見有虎侵牛犢卽遙呼砦下人羣  
逐之奪犢歸也至八十九歲精明無疾而終

傅山曰戴先生晚成官志不大遂又不久跡三數行事  
可不謂能厥官然余傳先生特取甲申以來居麓臺二  
十四五年風概有類漢管幼安也先生同年友蒲坂楊  
蕙芳亦不出先先生數年卒嗚呼丁丑榜山西凡十九

人甲申以來孝義張公元輔舉義死城頭外出處之際  
爲山西養廉恥者二人而已先生初成名卽自號止菴  
於今乃信

贊曰山不厭深水不厭遠神以逾勝邱陵有善此中有  
人昭餘戴公一菴於止縉紳流風

戴公事業震世值此盤根錯節迎刃立解以別利器  
疑有天才神授不知其得力處止是認得天理良心  
四字不變初心而已三復此文夙知樞於晉陽書院  
者敢爲先生質言無隱余由其言想其心預信必爲

祁縣志

卷十四

藝文

十四

包孝肅趙清獻司馬溫公海忠介一流人物旣而由  
尉氏良鄉而部數年如一日其剛毅自矢不畏疆禦  
則包孝肅也其精白一心可對天地德感闖寇則趙  
清獻也其安上利下扶危定傾則司馬溫公也光前  
裕後則孔顏也易簣之日無疾飛昇麓臺山廟碑記  
詳紀實矣則海忠介之蕭條棺外無餘物冷落靈前  
有菜根也所云言顧行行顧言其先生之謂歟嗟呼  
震公才德並茂光耀宇宙爲吾晉樹數百年人文者  
矣又何必悲悼其歿也樞謹跋略紀一以傳先生忠

孝廉節之萬一抑以爲後世之學先生者開無限法  
門 邵康節云施爲欲似千鈞弩操修當如百鍊金  
敢移以歸於震存先生 蔚州後學魏象樞謹識

有詩贊曰前代右丞公學本致良知抗節神宗閒朝野  
以爲師君實其賢裔淵源復何疑有德必有言聲名

冠一時

象樞再筆

同鄉二廣文傳略

李 芬 邑人

賈令爲祁鉅鎮乾嘉盛時戶口繁多人才蔚起春華秋  
實兼擅其長甲科鼎盛後先相望乾隆癸卯科鎮人岳

祁縣志

卷十四

藝文

十五

鳳池領鄉薦其同鄉硯友段濤病狂初梗陽岳進士廷  
元館昭餘桃李盈門號稱極盛祁縣中式者多出其門  
而段岳二字同受業焉癸卯春岳進士謂門人曰闡墨  
字數向無定額往往有至千餘字者今定額七百字通  
行各省是以少爲貴矣予揣秋試元題當是辭達而已  
矣一句諸生宜預擬一篇俟予改定遇則售矣門生依  
其言入闈果遇凡中六七人而岳與焉段不試故不中  
先是二子考遺才復遺名岳求某官緩頰學使始錄名  
送考段不屑負氣歸聞試題恚甚聞岳中遂狂居近孔

子廟廟後有田種瓜構一菴段奔入居焉家人共挽之不肯出以其病也遂聽之惟日給兩餐不使凍餒而已如是者數年一夕水大至漂其菴段驚起踏水出深已至盭正惶遽間忽老樹一株高與廟齊遂猱升樹杪躍登一閣得免詰旦水退家人號泣往謂已魚矣至則人菴俱杳聲在閣中急啟關入登閣果不死衣縷盡濕扶之歸病頓失探懷出一二文卷視之則所著四書題文及試策也是年壬子遂舉鄉榜距岳中科已九年矣岳是時已由大挑司鐸懷仁上憲奇其才謂非冷官中人

祁縣志

卷十四

藝文

十六

合疏保薦知縣旋丁艱歸服闋仍補聞喜訓導在任十數年涵俗同塵唯意所適達生任性不拘儒者之節讀書通大意除諸子百家外旁及道藏經典文亦時效之高才博洽爲世通儒晚益頽放如神仙遊戲人間生平著作懶不存稿致仕逾年卒書香寢微矣段亦援例就教補壽陽學官數年卒官子樹人成進士能世其業論曰段岳二廣文性情才學迥不相同而生同鄉業同師科名官職復同大畧亦一奇也岳性通脫倜儻不羈而放浪形骸似是嵇阮一流人物段則雅近李廣恂恂

如鄙下人儻所謂桃李無言下自成蹊者非耶一通一介背道而馳而不同若此同又若彼蓋其所同者適然而其所不同者固然也同不同之間可以觀二廣文矣

同門四先生傳畧

李芬 邑人

同門四先生者皆月三蘇氏之高第弟子也當嘉慶道光間月三以名進士領袖文壇一時門下多知名士而四先生適從器識文藝並能超出流輩而具體月三同學生推爲祭酒比之程門四先生云一温畹香名承蘭以恩貢候補教諭性恢廓好淹博涉獵羣書手不釋卷

祁縣志

卷十四

藝文

十七

應童試時以默寫五經三傳爲督學陳公所知拔置第一大加賞識入學後文名藉甚試輒冠軍設帳數十年成就人才甚夥而屢薦不售以研食終爲文有筆有書不名一體腹笥便便一時無兩兼好詩古文辭尤工駢體文月三嘗稱爲四六傳人惜不自收拾沒後稿多散失一董帷三名園磊落士也自負甚偉議論風生有王景略捫蝨而談旁若無人氣概嗜制舉文出入啟禎國初諸大家而仍不戾於時趣少負才名氣矻矻不能下人晚年學漸深氣亦漸平獎進後學不驕不吝早譽遲

達舌耕自活年六十始中甲子科舉人明年春闈報罷  
尋卒一范望川名秦亭少有大志負雋才然能斂才就  
範砥礪廉隅以高才生教授生徒問字者常履滿戶外  
孤芳自賞不逐時好爲文高簡有法獨得乾坤清氣閒  
作古近體詩以自娛屢躋棘闈以歲貢終一羅篲齋名  
映南儒而俠有幹局嘗因公被枉官悚以法勢危甚了  
無懼色少與溫董齊名試則並列高等貧乏不能自存  
家數口皆仰給硯田泊如也屢不得志於有司而愈益  
攻苦晚精天文算學日月交食星辰度數及二十四節

祁縣志

卷十四

藝文

十八

氣皆能預決試之果然以廩生終

論曰四先生皆邑名士又皆得宗匠之傳雖其性情學  
問不無少異而同原異派分道揚鑣主持一方文教固  
皆有功後學也獨惜其懷才未遇坎坷終身竟與齷齪  
小儒同一老死牖下而生平志事盡付子虛致足悲矣  
故畧叙其梗概以誌文人之薄命云

貢生張介福傳畧

李

芬

邑人

張介福名貽祺東陽翼人幼失怙事孀母以孝聞性孤  
介弱不好弄嘗落落寡合動與古會忻州楊晉珍重其

才羅致門下勤誨之心傳口授致相得也介福下帷攻苦不間寒暑愈年入泮尋以一等食餼家故貧不能卒業遂訓蒙作糊口計有薄田數畝暇則荷鋤往芸倦憩樹陰下聽禽聲上下間與二三野老話桑麻事歸仍誦弗輟往來書田農圃間有陶靖節既耕已種時還讀書氣象中年患怯疾醫弗效遂獨居一宅扃其外靜坐焚香行導引術惟一姪供薪米約數日一往餘雖妻子不令入也居數年疾差愈疏水自樂無復進取志矣生平無他嗜好惟喜讀儒先語錄身體力行不作口頭道

祁縣志

卷十四

藝文

十九

學居家有法門內雍雍夫婦相待如賓如梁鴻孟光故事事兄敬嫂白首怡怡冠婚喪祭一遵溫公家禮而略從俗變通之節祭先夏祭土不似他人瀆及天地也薄於自待而厚於待人遇一切義舉輒躬先倡率與人無少長一接以誠隨其資性爲說一二古人導其善心晚年學彌粹養彌深刑方爲圓和易近人偶一晤對如坐春風教人一本忠信故門下多崇實士由貢生候銓教職年六十餘卒里人至今思慕之

論曰吾友張介福古之信人也觀其知行合一始終無

間深造自得胸次悠然有諸已之謂信殆其人歟嗟夫  
士生今日欲見古人難矣不得見古人得見一與古爲  
徒者抑亦差強人意也躬行如介福吾目中不少概見  
即求之鄉先輩中亦是有數人物使天假之年得以友  
教四方其於古人之學不將大有振興也哉乃中流如  
故而砥柱云亡言念伊人不禁爲吾鄉深惜也

丹楓閣記

戴廷枻 邑人

庚子九月夢與古冠裳者數人步履昭餘郭外忽忽變  
易回顧無復平壤所至崖障合沓楓林殷積飛泉亂落

祁縣志

卷十四

藝文

二十一

其間如委紫練側睇青壁千仞如削目致爲窮也其上  
長松蜜舉而松末擁一金碧小閣摇摇如巢焉顏曰丹  
楓非篆非隸嵌空一窩億當閣逕而蛛絲荒織扃若終  
古矣俄而風水合注塊然偃卧遂經始閣材構如其夢  
莊生之言曰有大覺而後知此其大夢也戴生綴之曰  
覺苟非覺夢其奚靈有大夢而後知其大覺也聞戴生  
之言者曰是猶然寤語也是其言也夢車馬而喜夢酒  
肉而喜夢糞穢而喜者若覺而失之竊竊焉幸其夢之  
兆而不敢以爲魄崇之顛倒者也之人也不可以入吾

夢又奚足以入吾閣閣中藏書藏畫藏鼎彝藏茶藏酒  
以待人之能入吾夢者如其人之足夢卽不入吾之夢  
吾當入其夢又安知彼之不夢我之入其夢也苟精誠  
之不通超無友而獨存戴生之夢不復堪此寥廓矣

楓仲因夢而有閣因閣而有記閣肖其夢記肖其閣  
誰實契之總之皆夢記成復屬老夫書之老夫顧能  
說夢者也嘗論世間極奇之人之事之物之境之變  
化無過於夢而文人之筆卽極幽眇幻霍不能形容  
萬一然文章妙境亦若夢則不可思議矣楓仲實甚

祁縣志

卷十四

藝文

二十二

好文老夫不能爲文而能爲夢時時與楓仲論文輒  
引入夢中兩人蓐蓐隨復醒而忘之我尙記憶一二  
楓仲逕坐忘不留此由我是說夢者也楓仲聽夢者  
也說夢聽夢大有逕庭哉幸而楓仲忘之若稍留於  
心是老夫老引楓向黑洞洞地終無覺時矣傅山跋

重修麓臺山廟碑

戴廷枻

邑人

元至正元年朝散大夫周起重修有碑紀其事侯姓王  
名凌朝廷有事捕侯行至各峪溝見白鹿帶箭疾走侯  
隨入山見山形深秀白鹿入洞遂坐化其妹先至母後

至同日超昇奉旨封潤濟侯地名麓臺山白鹿洞天旱  
督兩立廟祀之三神像有骨存焉及考正史王凌字彥  
雲太原祁人叔父允爲漢司徒誅董卓卓將李傕郭汜  
爲卓報仇入長安殺允盡害其家凌及兄晨時年皆少  
踰城得脫亡命歸鄉里凌舉孝廉爲發干長稍遷至中  
山太守魏太祖辟爲丞相掾屬文帝拜爲散騎常侍出  
爲兗州刺史討孫權有功封宣城侯加建武將軍又敗  
吳大將全琮數萬進封南鄉侯所在有惠政民稱之不  
絕口與外甥令狐愚同典重兵凌遷爲司空司馬宣王

祁縣志

卷十四

藝文

二十二

誅曹爽進凌爲太尉假節鉞凌愚密協計欲迎立楚王  
彪軍到邱頭凌知勢窮面縛水次見宣王宣王遣主簿  
解縛反服勞慰之遣步騎六百人送還京師凌至項飲  
藥死其事與元碑不合魏末傳曰凌少子字明山最知  
名善書多技藝人得其書以爲法走向太原追軍及之  
時有飛鳥集桑樹隨枝低昂舉弓射之卽倒追人乃止  
不復進意其入山者明山耶妹爲明山之妹母亦明山  
之母耶此山傳有趕鹿溝各鹿溝白鹿引路何異鳥集  
桑樹因明山而追尊其父立廟焉亦未可知也侯世系

已見於正史但潤濟侯封爵其原委不可考或云侯縣之麓臺坊人潤濟亦就神澤云然白鹿呈祥此山遂爲神所憑依之地建祠特祀生斯食斯威靈如在亦猶壽亭之解梁淮陰之井陘耳其龍洞又爲祁八景之一萬山叢委一乳網緼每從炎旱得其甘霖爲禱者應天池之水侯所爲潤濟於無窮也歷年久日月侵尋風雨剝食廟貌雖存鴈頭非故僧人普統等募化四方人皆樂輸先君戴運昌復助其工之半鳩工量材越二年而告成較舊制爲廣大矣山中有郝繼煥者朴拙不妄語先

祁縣志

卷十四

藝文

二十四

君沒之九日降其神於繼煥言赴上帝之召聲音酷類生平呼棧言一二家政同姪炅泣送門外繼煥卽甦繼煥云先君騎赤馬金轡頭青衣從者十餘人向南行如飛往麓臺山道上先君爲戶部員外上書裁練餉數百萬先帝嘉納又阻逆案冠帶干城名教與侯救民忠氣之心異世一揆也先君事侯甚謹或佐侯以澤民

耶

亦別有職事辭侯以他往耶附記  
碑版之未以勸世之勤修斯廟者

新建文昌廟碑記

大陵

蘇捷卿

進士

按天文志斗極戴匡六星爲文昌星其屬有司中司祿

等神其所主生人之祿命及壽考死生登降之事周官獻民數則祭司民卽其神也而尤專司文教爲斯文宗主故其星大明則文運昌隆故曰文昌而世所傳飛鸞度世及十七世士大夫之說大抵廣張罪福近於妖祥薦紳先生難言之若其司教化掌祿命爲福德正神則信而有徵彼都人士之崇而祀之也亦固其所東陽羽故無文昌廟其議創也蓋經七八十年而今始舉事其地在本村震巽之間爲文明之位建正殿一而閣其上上祀奎宿而下祀文昌帝君則天象也其下爲廊

祁縣志

卷十四

藝文

二十五

廡者左右各三山門在前而兩旁皆繚以短垣昭其儉也役不踰期費不踰千金量力而供也事旣竣而囊有餘財人有餘力不遺累於後人也鄉人於斯役可謂善矣而余尤有取焉夫文運之盛衰視乎人心人心之所共趨而氣運存焉今鄉人之爲父兄者旣不鄙夷其子弟而立之塾延之師誨之以讀書稽古而又爲神立廟於歲時伏臘率其子若弟奉牲醴而祈福祐焉其相與有成之意所責望於後生小子者豈淺鮮哉夫前人有其志而後人不能終之非能繼述前人者也父兄所責

望於子弟而爲子弟者不足以副之其咎又安歸哉今  
斯廟之創建執事者既能終其事矣而鄉中之士之入  
斯廟者思廟貌之所由建及父老所以責成之心而因  
相與讀書稽古以振文運於未衰亶所期也廟旣成將  
書其事於石而問記於余余故爲述建廟之意以示夫  
後來之有志者

昭餘書院設立膏火碑記

程茂冲 邑令

謹維

熙朝開國成均拓養士之宏基

祁縣志

卷十四

藝文

二十六

聖主臨雍講席舉作師之盛典黨有庠術有序

教澤布於中邦春而誦夏而絃

德化被於薄海由是黌宮旣闕書院肇興緬鹿洞之成模  
重德行復崇文學溯鵝湖之遺制明道誼更取才華盡  
心力以甄陶蔚人文而崛起惟茲祁邑夙號名區昌源  
潌清麓臺聳翠靈秀洩於巖谷英俊顯於閭閻太真幼  
卽屬文建殊勳於晉室叔玠少能請益著令望於隋廷  
三疊琴諧王右丞導夫先路八义詩就温飛卿步厥後  
塵凡屬名流穎達固由天授仰惟前哲功修端藉師承

是以王公李公駐馬而特隆教養萬令田令下車而酷嗜栽培棧樸興薪樵之歌非今伊始茅茹卜彙征之吉自昔已然則昭餘書院之大有裨於士林也蓋如是無何流風漸歇夙構空存美哉輸美哉奐棟宇非不隆崇鳥斯革翬斯飛庭戶依然廠麗第講堂闐寂不聞誦讀之聲肄館蕭條絕少吟哦之韻爰思其故豈曰無因甲科乙科丙科漢室之良規成式而廩貯不豐外舍內舍上舍宋朝之古制堪遵而膏資未裕是必賴乎羣力庶能集乎多金則豫大之模可成而經久之方遂定顧事

祁縣志

卷十四

藝文

一二十七

必有唱首惟本縣捐廉而紳耆咸和物貴有經繼發當商生息而子母相權法立則財不匱源遠則流自長從茲秩秩斯干俾得優游而藏息亦且濟濟多士俱看騰踏而蜚黃矣

有條規刻石可考

重修昭餘書院碑記

國

旺

邑令

昭餘書院在學宮之西後有

祁大夫祠余於乙酉春奉

命調任茲邑周閱城池壇廟尚皆完固惟書院傾圮已久僅存基址

祁大夫祠亦滲漏欹斜不蔽風雨不禁目擊而心動焉詢之耆老僉稱自祖法陳侯重建以後日漸頽廢不復修葺刮鹽土者以爲利藪乞丐者不時棲止甚至宵小潛藏爲害市井儻不議重修數年而卽爲墟矣竊思爲政之要所寶惟賢文教不興則士習不振苟本實先撥而欲枝葉未有害也其可得乎矧茲地爲

祁大夫食采之邑飲水當思其源數典毋忘其祖迺令先賢失所憑依後學無所則倣此非守土之過歟丁亥春余捐廉首唱勸諭城鄉紳士各自量力輸資共襄義舉

祁縣志

卷十四

藝文

二十八

幸樂善者衆而集腋得以成裘嗣於三月初旬庀材鳩工立有內外規模川廳講堂一律更新東西兩旁又添設房舍以爲諸生肄業處所並重修

祁大夫祠莊嚴廟貌輸奐改觀迤南舊有

奎星樓早經坍塌全行折修更添造連階以通雲路下建牌坊以爲門戶兼築圍牆以杜登攀復於學宮左右墻垣大殿兩廡及櫺星門同時修整自暮春以徂初秋始克藏事在公執事諸人非惟不辭勞瘁抑且朝夕饗殮皆各取給於其家蘊隆之際奔走不遑真可謂踴躍急

公矣茲乃聿觀厥成雖慨助者咸勒姓氏而司事者尤著辛勤由是籌備膏火延請名儒與諸生昕夕講貫經術昌明文運蒸蒸日上將見享血食者俎豆常馨得薪傳者科名繼起詎惟一時之盛舉實亦億萬斯年之休也是爲記

重修學宮碑記

崇  
祁之學宮自明以來闢浮屠氏之廟而遷建於此所以崇

先師興教化議甚正典甚鉅也迨年世且遙累經修葺邇來

祁縣志

卷十四

藝文

二十九

榱崩瓦裂傾頽已極凡我同人每一至怵目驚心大有所駭爰以重修之舉請諸邑侯陳公公固有志興學慨然許諾不移時親詣明倫堂集紳士耆民勸以各出貲財共勦盛事又令分班經理各殫厥心其時催施藉者有人司錢庫者有人以及庀材督工轉籌等項罔弗縷晰條分洞若觀火誠快事也未一載公解組去邑侯楊公蒞任與公有同志奈數十餘日未終其事又去繼公而來者爲葉侯倣二公之心而經理之

崇聖殿

大成殿始以竣工後泉幣稍稍不繼而勢難中止值劉邑侯來蒞斯土李學師來秉斯鐸協力經營董事人等又復露雨臨風奔走四鄉共得布施若干金而尊經閣兩廡戟門以次修理又於戟門左右建碑亭各三楹以迄名宦鄉賢兩祠泮池牌坊照牆無不從新丕振是役也起工於丁未春初告竣於庚戌秋末雖未能設施金碧而土木磚瓦之工已極大備遂以重修顛末合詞請於邑侯爲之記邑侯曰余來茲晚何敢貪人之功以爲己力諸君其勿復言退而復請於學師學師曰余始至祁工

祁縣志

卷十四

藝文

三十

已將竣夫不悉厥詳胡記厥事且閱君等所請合詞明晰曉暢叙事簡括蓋卽以是爲記僉曰唯唯否否且如是將毋不書撰者名乎恐無此禮也學師曰而不觀之詩乎伐柯九罭諸章皆頌美周公之詩而子朱子以東人系之夫人之者統之也可統以東人見頌美聖人之詩有同心何不可統以吾祁見修理聖人之廟有同志也於是卽以斯言勒諸貞珉用垂不朽陳邑侯名 士玉

福建閩縣舉人楊邑侯名 金華福建閩縣舉人葉邑侯

名 中鯉河南商邱縣進士劉邑侯名 佳珣江西新淦縣

拔貢姜學師名也魯汾陽縣恩貢任學師名伯渾源

州廩貢李學師名士瑾臨晉縣拔貢例皆得書

### 重修明倫堂記

臨晉 李士瑾 教諭

有司之堂主乎治儒學之堂主乎教顧化民成俗必由乎學立教之地不綦重哉祁學明倫堂宏廠壯濶偉然稱傑構惟是椽榱不無圯毀蓋距前重修已七十年余始至卽議修舉而迄無成者亦且七年於茲矣甲寅楊侯治斯邑蓋能於官者余以斯役爲愆憑侯曰諾不旋踵擇紳士而聚旃屬令經理勿辭勞勸捐勿避怨出捐

祁縣志

卷十四

藝文

三十一

勿嗇囊於是量橐出貲不約而醵金錢至者日踵於門一切土木工作經理諸君指畫監視無暇晷泊工將十之七而侯以調繁去署篆向侯葛侯相繼爲理題署張侯相與有成稍不足諸紳士又躬親募於戚里之殷實而好義者起工於乙卯告竣於丁巳黜堊丹雘巍然煥然視前所謂傑構有過之無不及已記有之雖有嘉肴弗食不知其美也雖有至道弗學不知其善也自是之後詣大門見照墻屹立當肅然起敬也仰視儒學匾宜知醕儒大儒胥自學出也進而儀門知可儀也勿敢褻

也進而東西齋曰時習本四子書開章第一義也無曠時也曰日新本湯盤自新之旨也當日進無疆也進而左右創建各三楹一顏敬業示之各業其業以致道也一顏樂羣俾知德不孤立可相觀以善也進則爲明倫堂君臣父子夫婦昆弟朋友彞倫攸叙貴以實不以名也堂之後左右新建亦各三楹一顏尋樂處已入於室有樂境可尋也一顏近聖居蓋西附

大成殿之左側故名之終始典學醕儒果自此出又命諸生手鈔從祀賢儒功德錄於其中近聖之人錄於此近聖

祁縣志

卷十四

藝文

三十一

之功亦可不息於此也外此重修兩丁籩豆簋鉶各祭器使知禮也習禮亦以近聖人也又於學署挖補潤色使知尊師也尊師卽以近道也夫履斯地者顧名思義躬行而實踐之將人文蔚起蒸蒸日上溫王古李諸先達莫能專美於前則敷教之堂有以立化民成俗之本非治得體要同心協力曷克至此故備書之爲典學者歸其庸也至於出納之數度度之繁則有管庫者總其綱持籌者列其目也故不贅

聖廟重修碑記

范如璧

邑令

人才者國家之楨幹學校者人才之淵藪從古帝王他務未違必先創辟雍詔天下郡縣立學使凡學者周旋乎禮法之場沈潛於仁義之府期於明體達用處則爲正士出則爲名臣所以端風化之源典至渥也意至隆也我

朝二百餘年追崇

聖道培植儒林薄海內外罔不風教修明人才蔚起况祁邑地當孔道山川靈秀代有達人其學舍之森嚴整肅土之遊庠序者更足以觀感於其間癸丑冬余攝篆茲土

祁縣志

卷十四

藝文

三十二

甫下車卽晉謁學宮覽其規模之壯麗庭宇之崇閎鐘虞禮儀之匡飭竊歎前人之創制備矣然而棖棟不無傾欹也墻垣不無頽圯也丹漆雕堊不無摧敗於榛蕪剝蝕於風雨也爰考碑記係乾隆丁未年重修迄今六十餘載久未葺治余慨然有補苴之志顧時方多事城垣鄉練皆當以次經畫而四方賓客傳車之至徭役頻仍竊恐民力不遑有志未逮越數月適有紳士范子桂林等稟請修理余甚善之而詢其經費所由出云有邑東門文昌閣經理李子天培馬子士傑愿將閣內餘銀

分輸以襄此事於是卜吉興工與戴子璜渠子夢奎李  
子青陽等分司其任鳩工它材一時并作自大成殿以  
至櫺星門外前後左右莫不增修破者補之圯者葺之  
丹碧藻繪內外皆煥然一新大抵基趾欲其堅固氣象  
欲其堂皇俾遊於中者知

聖道之尊嚴宮墻之峻絕肅然起恭敬儼翼之念巍然仰高  
明正大之規也蓋經始於甲寅年之四月而落成於八  
月計費白金八百餘兩事成請余爲之記是舉也余方  
有志而諸君子遂能成斯美以輔余不逮足見尊儒重

祁縣志

卷十四

藝文

三十四

學邑人士風俗之厚樂善之誠也既喜其成功之速而  
尤願後之學者躬修實踐砥礪廉隅周旋乎禮法之場  
沈潛於仁義之府務期明體達用儲爲

國家楨幹上以副

聖天子樂育之隆下不負今日修葺學宮之意是則余之厚  
望也夫是爲記

同年三進士記

李芬

道光癸未科會試榜揭山西中進士者數名而祁得其  
三一梁樸齋輿一閻用川汝舟一段勗齋樹人祁在山

右藁爾邑耳而一榜三進士誠未之前聞試畢

引見梁以知縣用分發福建閩亦知縣分發河南段歸部銓  
請改教後數年樸齋補建陽縣以不善事上歸改官大  
同府教授用川未及補缺卒惟勗齋補澤州府教授在  
任八年士論翕然年七十告歸含飴弄孫逍遙林下日  
與一二老友敲棋鬪茗以樂餘年咸豐癸丑歸道山矣  
論曰祁自周秦以來歷漢晉隋唐代多偉人宋元而後  
才寔微矣

國朝定鼎二百餘年成進士者僅數人耳而癸未一科三

祁縣志

卷十四

藝文

三十五

人鼎峙猗歟盛哉向使破浪乘風鵬搏萬里安見豐功  
偉績不逮古人耶乃皆強弩之末勢不能穿魯札徒以  
一科三捷留此一段佳話抑末矣書之以志一時

神瓜記

李芬

咸豐八年秋七月東高家堡村南觀音廟殿前磚縫忽  
茁瓜苗一本五支皆長丈餘南向大士像蔓延階上結  
大瓜百餘小者無算甘香異常瓜村人驚喜護以木欄  
遠近來觀者肩摩轂擊咸嘖嘖稱異究莫知爲何瑞有  
摘以試病者輒愈於是求瓜者麇集食無不效香火連

月不絕摘瓜漸稀繼之以葉病亦竟差霜降後支蔓猶存遂相傳爲神瓜云

唐御史大夫王鉞墓誌

常 袞

尊主直人則醜正者售禍權侷才忌則害能者構忤况位抗三府勢傾一時天下之事懸在掌握而剛腸立朝鷲鶚橫秋匡拂摩切姦邪是懲至使陰謀協比乘間竊發曖昧摧辱加於大臣公諱鉞太原祁人也昔在元宗之盛外攘獯戎內立制度混一天下圖萬世安至於軍旅征伐府庫賜予聲明羽儀禮文憲則莫不懿鑠震曜

祁縣志

卷十四

藝文

三十六

龐鴻精備國用薦費闕於經入固宜有卓立大才統集其事公當此時以御史大夫領京兆尹佩帶使印十數焉黜幽陟明考察風俗地征國賦均輸平準天子六閑上林三官皆總制之未央前殿離宮下苑亦護作焉公以典訓經之文法緯之明察綱之廉平紀之其運也合變陰陽有以鼓其動其密也至精鬼神不能窺其隙銜策害郡之黠鈐鍵多門之蠹裁兆物計億事沛有餘力矣動一節搖百支無所竄情矣故威檢轂下風清闡右紅粟冰紈露積朽腐星精雪駟外廐填益廣靈囿之百

里奉祈年之萬春漢家水衡少府錢四千萬至是而過之俾我巍巍之朝四海雄富丕變於太公之力焉入則轉移大謀出則平決羣議天子垂拱於旒宸宰臣高抗於廟堂時佐輔陳希烈忌公有宰相器憂在移奪又楊國忠與公權勢相傾事不兩立會有凶人邢宰陰聚姦黨於長安里舍中公以京輔都尉之卒逮捕悉擒詔公與廷尉雜理而希烈洎國忠使法吏以牘背喻風指於凶首引公愛弟鐸連坐公具表其狀請自拘於司敗上以罪不相及猶遣使慰厚之而沉猜罔上者密白而下

祁縣志

卷十四

藝文

三十七

其書舊制大臣不對理陳寃天寶十一年四月十二日奉麓纓盤水北面拜跪而自裁妻子移隸宅於荒服嗚呼歷觀憂國愛君之臣忠信未達而左右所鞠按成其無狀之罪豈勝言也則王章晁錯納忠漢朝衣冠僂於都市家屬徙於合浦古人有言曰刑罰出於身實難自他及之又何害也知我者其天乎公始以茂才異行首於策詔凡四佐王官之邑七領憲府之命一至殿省再遷臺郎大司空大司徒各一官族德政燕國公張說已叙於烈祖之碑夫人河東郡夫人薛氏存與其榮歿與

其辱南北萬里流離十年飲恨餘生以存宗祀以大厯三年五月終於某所嗣子稱以不天之釁承覆巢之餘遷逐炎海幽冤霜露家未悔禍慈親凶歸生人之難無稱之比永惟先君及難葬故有闕泣血忍死獲終哀誠以大厯五年三月二十日合祔於中書皇考眞宅之次相國許昌公嘗感府辟緬然懷舊改贈移寢周於它喪有以見京兆知人之明許昌報德之厚袞追叙遺烈亦門生表墓之禮銘曰

知者謀始不能知終明者察微昧於數窮任我以事效

祁縣志

卷十四

藝文

三十八

我以功吉凶悔吝生乎其中無象無端茫茫蒙蒙伏恨黃墟孰問蒼穹小君從祔松柏來同

平陽府聞喜縣儒學司訓兼署曲沃縣教諭戴公

暨文孺人合葬墓誌銘

桐城

張

英

敦復

公諱廷栻字楓仲一字維吉一字補巖號符公太原祁人其先世有成忠者始自雁門遷祁鼻祖也六傳至高祖例贈通奉大夫河南布政使巡簡公公禮曾祖勅贈兵科都給事中應贈通奉大夫河南布政使勅授晉階奉訓大夫直隸大名府別駕公賓祖隆慶辛未進士累

進通奉大夫兩河承宣布政使前周歷諫垣侍經筵多  
所獻替天下皆聞其賢文太青先生云氣節忠勁可繼  
包海二公洵非虛譽也己卯秋九月持節封永和王隨  
奉勅諭整釐三邊所至政聲鐵中錚錚邊人至今悉能  
道之光啟公父崇禎丁丑進士歷官戶部福建清吏練  
餉司員外郎運昌公戶部有男子子二人公其仲也戴  
氏自公禮以來清白世家矣公生負異質稍長習經生  
業目連十行下博極羣書尤喜讀左國史漢久之學日  
益博爲文峭健有氣力而折衷於儒家者言每屬文立

祁縣志

卷十四

藝文

三十九

就克出聖賢意戶部獨奇愛之曰異日繼志賴有此子  
凡與祖父交遊一時名公如京山李尙書維楨關中趙  
太保彥雁門張少保鳳翼陽城白尙書所知太原李大  
中丞成名過昭餘主其家見公髻齡如成人諸君大稱  
賞嘆曰積厚流光神童屹然逸羣矣出應童子試三試  
皆第一受知於袁督學使繼咸亟推許以氣節文章名  
世補博士弟子員屢擢高等食餼崇禎癸未季冬有旨  
薦舉地方人才廖給諫國遴薦舉於朝甲申三月鼎革  
遂寢公故衣冠貴胄宦裔翩翩致足喜而邊幅口實簡

樸如寒士絲竹裘馬一無所好喜讀書寒暑無間無所  
不覽樂道天下之善以傳焉古今忠臣義士孝子烈婦  
行敦而名不彰者於公文見之獨以表微闡幽爲已任  
好學不倦著述滿家鋟版行世丹楓閣藏版海內共知  
天下名士南方多聚於冒巢民水繪園北方則丹楓閣  
稱極盛焉李徵君孔德紀實錄云四方賓旅從之如歸傅  
徵君題額云仲適集一朝大聲精選根塵映發如坐高  
秋榻榻林也卽此知丹楓子之學術經濟尤以刎頸交  
著者傅君青主傅君須男白君居實胡君季子薛君文

祁縣志

卷十四

藝文

四十

伯張君中宿李君鳳石畢君亮四艾君千子黃君石齋  
馬君君常閻君古古顧君甯人汪君茗文楊君猶龍王  
君山長施君愚山宋君牧仲吳君鹿友唐君采臣王君  
貽上魏君環溪馮君大木田君兼三朱君小晉李君孔  
憲閻君百詩范君彪西痔后隱逸明公篤信之學遂定  
交爲忘年友崇禎壬午年遭母郭孺人之喪哭泣擗踊  
見者憐之甲申闖賊之變京師失守公在圍城中左右  
就養奉戶部歸里高士傅眉贈以詩云危患臣兼子憂  
虞孝作忠古人局膽識學術妙圓融亂世難愉色先生

不辱躬疇昔已如此安排且樂終插援須白菊高閣起  
丹楓體不膏梁貴心還筆硯雄士田兄子讓財貨友朋  
通豈特文章著猶多國士風卽事成韻紀公實錄至康  
熙六年戶部卒喪葬之儀盡情盡禮一如孺人後任聞  
喜縣司訓三月應徵賦讀書甚愛陶宏景人事殊悲庾  
子山句蓋自傷也或曰楓翁往來多勝國逸民降志求  
全諸賢或信然歟逸仙張天斗雪竹貽楓翁詩賞月吟  
風興素豪虛心接物自清高歲寒雲凍埋深雪節在何  
妨暫折腰楓翁少年遊艾千子袁袁山門博雅能文著

祁縣志

卷十四

藝文

四十一

述甚富魏環溪顧亭林謂其古文可接震川訂刻古書  
數百種及名人高士詩文之不能自梓者刊刻行世王  
阮亭題其廬曰山右龍門版存丹楓閣宇宙盡知之傳  
隱君著性史外書目舊俱有版又有諸子註解玄釋兩  
藏精義續編杜遇楓仲編杜詩  
青主評點李詩評點唐詩評點霜  
紅龕詩文集諸傳奇集梓而藏之簡赴廣文任時捐已  
貲重修學宮糾衆勸建尊經閣有募緣疏載錄東門外  
有太子寺李唐僖宗皇嗣黃巢陷長安遁山中證浮屠  
果者年遠將廢公拮据葺令士民有所瞻仰見人才不

古咎將誰歸而嚴教條與諸生講學明倫言行而身化之一時人文蔚起士風改觀督學使楊按臨嘗以理學淵源見推每講通家聲氣而畧職事崇卑令畧曲沃教諭到任卽修學愛士士大夫至今稱頌不已四方人士探奇問字滿坐絕不拘牽師生世法所謂物外風流聞實傾海內中丞宋總藩胡仰慕品學峻絕忘分下交公天性孝弟其兄早卒教育遺孤三姪皆能成立咸爲庠生者治家一遵祖父庭訓衣食皆取之田畝不屑計子錢祁志久廢纂修重刊繼先志也周廣文卒於官舍貧

祁縣志

卷十四

藝文

四十二

不能歸賴公始得還里凡里甲戶族有甘苦不均者務調劑之使得其平遇事無難易而勇於敢爲爲人排難解紛往往義形於色宇宙人人德公不問識與不識咸欽慕之執友傳隱君山橋梓相繼而亡始終相爲以篤友道桐鄉寒暑常通有無周貧乏囊中毫無所蓄四方逸士得公之誘掖者約有數千公生於萬曆戊午九月初九日卒於康熙辛未四月初六日受春秋七十有四學者私諡文毅張子聞之曰是配文孺人爲諸生世顯女勤儉謹厚善事舅姑郭孺人有手疾半載衣不解帶

孺人以孝稱且幼習詩書識大體作繼先清白志四箴  
勗子時論美之凡廣文學績所著孺人從容商畧佐於  
退食者多嘗訓子與民興利除弊勿負我教爲孝子永  
豐令記豐人望之如望歲如旱苗之滋膏雨循良在望  
豐人建祠祀之見諸吉邑內閣學士李侍郎振裕著德  
政紀事可考而知也廣文沒於官舍孺人護柩車歸里  
以頭觸棺絕而復甦旣而泣囑曰爲我留空壙以待未  
亡後果因公捐館而感傷越五月亦卒於辛未九月初  
五日稀壽七十有四今之合祔從其志也男子子一記

祁縣志

卷十四

藝文

四十二

江西吉安府永豐縣知縣娶明孝廉大賓李中馥女孫  
男子一茂實由庠生入國子生娶中馥之孫女諸生介  
賓李廉女曾孫男子一崑瑜曾孫女子三俱幼未聘子  
記奉公與文孺人合葬於麓臺山忠貞顯考之塋預期  
而爲書來京師請銘於予其意甚勤予與公執友也公  
在京師著述日富毅然以名教爲己任與予能共梓遺  
書垂世全爲世道人心計相契誠深矣後赴廣文任遙  
相倡和郵筒往還自此以後恃公爲領袖山川雖阻聲  
氣自通彼此俱忘春秋之高曾日月之幾何而遂溘焉

作古聞公凶問愴然有棄琴之感予之痛情與日深其  
人品學問所目覩者博雅慷慨千里誦義而與友者皆  
風韻名流翰墨時望文著半可集等卷數百種鋟版行  
世書名略紀於後徵諸衆記特惜其畸人異撰乃施之  
不盡其才壽之不稱其德位不至於顯而僅以貢士廣  
文卒也天之生斯人也而命則如斯也是非予之所能  
知也何忍銘公也雖然吾兩人相契甚篤又何忍不銘  
公也銘曰

逸才之焱焱奇氣之堯堯馬鬣斗牛之間龍光慘其寥

祁縣志

卷十四

藝文

四十四

寥若過昭餘而憑弔焉此戴子符公之墓也嗟哉誰之  
永號

用川閻公暨德配李孺人合葬墓誌銘

大陵

蘇捷卿

用川閻君之卒於豫也其子正大旣迎其喪以歸以卜  
葬未得吉壤故遲之又久旣而君之德配李孺人亦卒  
乃謀安厝於邑南何家堡西卜得新阡葬有日矣正大  
持狀謁其師吟舫黃公求表其墓而併以狀來乞余爲  
之誌而銘之余惟君固先君門下士又與余爲殿試同

年交最久相知亦最深則銘君固余責也敢以不文辭  
君姓閻氏諱汝舟字用川號仙雲世爲祁之望族曾祖  
諱仁祖諱志讓父諱純太學生母許太孺人生三子君  
居次君之人品學問吟舫先生言之綦詳茲不復贅余  
年幼卽識君後隨計入都輒與同寓朝夕過從獲聆其  
言論風旨有以深悉其爲人大抵君秉性謙冲自處不  
立崖岸而守正不阿不肯隨時俯仰故士林恒重之癸  
未科君旣獲售余亦赴京補 殿試 引見之前日本  
省同年十一人齊集於 圓明園之客寓時諸人皆以

祁縣志

卷十四

藝文

四十五

君老成夙望競以館選相推君獨以爲不然曰吾老矣  
館選非所期惟慮吾性剛介恐不能低首降心爲風塵  
俗吏幸得除一部員足矣已而 朝命下竟以知縣用  
君聞之輒翻然改曰士患無所可用耳安有仕而必擇  
官者因暫告假歸省墳墓明年四月卽赴豫居久之有  
缺出君以例應補果以不善迎合爲當路所擯抑卒至  
淹滯三載鬱鬱然賫志以沒嗚呼悲哉君之將赴豫也  
前數日余往候之見其神采奕然精悍之色見於眉宇  
余心竊壯之次年接君手書備言宦途嶮巇及諸同事

脂韋逢迎狀意若甚鄙之者余固疑君之不能屈已以求合也適有客自汴來者爲余言君所以不能補缺之故且言君近日善病精神殊不似曩時余心憂之然亦不謂其奄忽間遂至於長逝也迄今卽君之言以驗其所守其自知未始不明又君家素饒非若爲貧而仕徒借升斗之糈以糊厥口其所以明知其難而決於一出者特以讀書數十載所學何事幸而登第授官卽思有所樹立以一驗平生之抱負而顧其志卒不得遂嗚呼其人爲之耶其天爲之耶君有子正大少負才名十數

祁縣志

卷十四

藝文

四十六

歲卽入邑庠君旣卒益肆力於學隨食廩餼每科歲試輒列前茅藉然有聲鬻序間余聞之其源遠者其流必長烏知天之暫屈君於今日者不且有所待以大伸於異日耶然則君亦可以無憾矣君娶孺人李氏甲午科經魁洋公孫女鄉耆培芳公之長女子卽正大一娶庚戌科武進士原任山西全省京提塘候銓都司劉杰公之次女女三長適衛守府楊璠公之三子營千總永泰次適庠貢生渠公紹崙之長子辛卯科舉人夢奎三適大學生呂堉公之次子監生際虞孫男二長心銳次心

鑑俱幼孫女二長適楊公永泰之三子名苞次幼君生  
於乾隆己丑年十一月三十日申時卒於道光丁亥年  
二月初十日卯時年五十有九孺人生於乾隆辛卯年  
六月十五日丑時卒於道光乙未年七月二十九日巳  
時壽六十有五今於道光十六年十月初四日巳時安  
厝銘曰  
人可我否人榮我醜存冰雪心厲金石守以光乃先以  
昌厥後讀聖賢書庶幾不負

祁縣志

卷十四

藝文

四十七